

宋學士全集

一三



新書  
圖書  
中文書



宋學士全集

(三十)

J  
17.8  
1.2122

宋濂撰

# 宋學士全集卷之二十三

碣凡二十章

太初子碣

宋之德深遠矣。暨其衰微不振。人能取其國而不能絕其子孫。百餘年間。顯官名士。森布於天下。當世稱多才者。歸趙氏。此豈人力乎。非天曷能致此乎。吾於浦江得太初子諱良本。字立道。其裔出於周王元儼。至太初子十世矣。太初子六世祖士翮。爲處州兵馬鈐轄。高宗時來遷睦。卒贈武節大夫。武節之子武義郎不玷。復自睦徙浦江。高祖武經郎善近。曾祖武翊郎汝沮。祖崇。後父必俊。自祖以下始不仕。皆以儒名。至太初子尤異焉。太初子少時好讀書。從學於鄉先生吳貞文公萊。通經史大略。不喜專精爲章句。有得諸心。輒見於行事。其言纏繞可聽。其爲家以禮。取友必君子。凡所友者。善譽惡諷。終身不變也。妹歸樓氏。喪夫。二子楨楠。幼樓氏族利其貲。欲以計奪分之。楨懇官未報。天死。長老有閔。是婦子者。爲言於縣。縣擇可託孤者。皆曰莫賢於太初子。且其兄也。可任。縣籍其貲具土田。符太初子主之。太初子視孤甥如子。旣長。授以其籍。絲髮無所私。太初子行方嚴有度。柔仁者咸慕與親。剛愎者惴憚不敢過其門。翰林待制柳文肅公貫。太初子交友。雅愛太初子爲人。命從朱先生震亨遊。朱先生老儒。通醫術。最嚴毅。不許可庸俗士。獨樂太初子。盡傳以其術。太初子謂吾欲及物。而患無其道。今乃得之。遂發其術濟病者。甞人來問藥。

與畢塵去。不取賈。監察御史聞太初子精於醫。薦於朝。授以醫學正。太初子笑不就。而太初子之嫡亦且長。於是太初子謂曰。兒善治而家。吾將休矣。遂關一室以居。研摩養生之說。朝夕粥一器。不御醃鹽蔬蕪。盛暑不簞浴。烈寒不附火。踰三十年無懈意。至老須髮不少白。人望之以爲真神仙人。而太初子亦若有所自得。人莫測也。洪武六年。太初子卒。年七十。先卒之一日。坐床上。謂人曰。明日良。吾將歸矣。顧稚子取筆與簡。預書斂葬儀。曰。衣我楮衣。履我繩屨。屨二量。宜用弊者。無華侈。汗我。至日晨興。冠衣正坐。啜一食。斂手瞑目。撼之。則逝矣。二月十五日也。三十日。葬於華表山之原。夫人戴氏。先四年卒。合葬焉。太初子嫡曰友昌。孫曰季昇。季昱。曾孫曰同璿。同珪。同璣。濂交太初子翁季間最久。法當銘。銘曰。人之將寐。昏氣乘之。形憊神疲。不能自持。矧惟死生。世之大事。誰能兩忘。談笑而去。猗太初子。脫然天遊。與道始終。知命不憂。曷由致斯。其欲甚寡。形且頓忘。孰不可舍。世之鄙夫。雄傑一時。疾病之臨。鼠伏狐悲。太初之道。匪神匪僊。充乎兩間。無後無前。

劉府君碣

烏傷劉君大音。字韶父。凝貌寡辭。撫世一以誠。人至於不忍欺。當四筵合座。囂聲撼屋。居處其間。默如也。或出一言。輒中肯綮。而萬理皆解。且才識愈絕。人多嗜腴田。設巧穿。期必獲焉。君曾不舉目。睨之。世咸以病君。君曰。吾將利吾胤耳。子柰何欲陷之邪。未幾。多田夫苦賦斂繁。荷械走冰雪中。咤曰。劉君其智人也。哉。歲祲。盜夜半入君舍。攫金以去。君揣知其人。帥子姓蹤跡於野。遙見一家燈燭。燿紅。君曰。此是已。隔虎

落偵之。盜方轟飲。味爽縛送於官。盜爲衰止。卽欲盜。辭舌相戒曰。劉家翁在。何地容吾屬乎。族人瀕死。子方乳。以業券泣授君曰。非君仁厚。不足以保此。有子與無子同。願爲盡心焉。君藏券篋。衍候子長。召而觴之。枚數以還。祖揆弗逮事。父訓復蚤世。君每思之。必漣然飲泣。奉母李夫人。唯懼有拂其志。君之弟晉。繼於別宗。夫人愛之甚。泉若布君縱其欲。弗敢靳。其焚券周急。拯難嫁娶。又不一而足。嗚呼。非古之所謂吉士者邪。君之傳裔有家牒。中牽大夫公亮。五世祖也。家嘗顯矣。君雖不登仕版。其行無歉者。娶余生誠。剛魯道。四男子及女二。賈叔文。宋慎。其婿也。卒以洪武辛亥十二月三日。葬以癸丑十二月某日。壽七十三。墓在瀟溪黃垣之原。從先兆也。剛旣從予學經。有文聲。而君女又歸予家孫。義當銘。銘曰。玉孕於山。其木華滋。淵產靈珠。水則有輝。鄉有吉士。俗醇而熙。一旦死矣。吁其悲。

### 進賢朱府君碣

先王之法。不行於後世。道隱民散。仁鄙壽夭。貧賤強弱。爲吏者多弗暇問於斯時也。百里之邑。苟有忠信之士。聳善扶誼。以裨助於政教。不亦空谷足音之可喜乎。如府君者。誠可銘已。府君諱志同。字與可。姓朱氏。進賢朱方里人。曾祖仁。無嗣。其妹適宋某年進士豐城袁某。生梓。梓遂來爲仁後。府君之祖也。父粹中。字幼純。漕貢進士。有材略。德祐世變。能聚兵立堡以衛一鄉。寇鋒不敢近。府君天資亮直。尤好赴人之難。科繇或不平。視其力單者。仗助之。閭右作威福。鉗劫細民。不敢少吐氣。府君奮然爲直於上官。人人敬畏。不敢作非義事。縣大夫聞之。嘆曰。是剛介不羣者也。是有補政教者也。遇以賓禮。民間利病。必一一詢之。

府君爲之傾盡邑以治最聞。天歷己巳大儉。民有菜色。部使者行縣。延府君於庭。叩以勸分之策。府君曰。進賢雖小邑。其藏粟者何翅百家。計其飽妻孥外。有餘則輸於官。分給餓夫。使者一警咳間。所活數十萬。不難也。然示之以至仁。布之以大公。衆將樂於從化。願力行之。行之當自志同始。使者曰。君言是也。命卽爲之。三百里間無填溝壑者。府君義聞彰著。監察御史有嘉其能者。首以茂才薦。府君自度不能隨俗浮湛。力辭不就。築室白湖嶺之陰。鑿池種樹。若將終身。揭文安公爲扁堂曰真村。文白先生范公亦爲賦詩。江右學者多傳誦。府君篤於訓子。闢館舍。聘名師。使其子渙就學。族媼子弟貧而無資者悉聽。已而渙學大進。如水湧山出。復使裹糧遠遊。以充其學識。束脯裝錢之費。雖鬻產給之。無倦色。不幸渙早世。府君嗚嗚而泣。復召諸孫夢炎訓之。如訓渙。夢炎晝夜奮勵。雖寐不敢忘學。旣成。登至正辛卯進士第。奉觴爲壽。府君喜曰。爾不負吾所屬矣。元季兵起。夢炎奉府君辟地南昌之蜀溪。未幾。以疾終。癸巳春正月某日也。壽六十六。秋八月某日。始自蜀溪奉柩還葬白湖嶺之白楊阮。初。府君愛白楊風氣回旋。有卜藏兆之意。及是見夢於人曰。吾將寧魄此地矣。衆咸異之。府君性耿介。人有過。必詰責之。雖面頸發赤。不少恕。家政嚴肅。闔門千指。罔敢有違教條。其於勢利紛華之欲。則澹然無動於中。鼓琴吹簫。酣咏水光山色間。有不知老之將至也。娶臧溪吳氏。子男二。長卽渙。卒時年三十五。能古文辭。虞文靖公甚器重之。遺藁若干卷。其門人袁鏞。鏗梓以傳。次紹信。後府君四月亦卒。女二。舒某。胡某。其婿也。孫男六。曰和。曰夢炎。通歷代文獻之學。如指諸掌。禮樂家賴之。曰良。曰厚。曰碩。曰惠。曾孫九。則以進。以任。以武。以應。云云也。府君葬後二

十五年濂待罪國史。夢炎官於儀曹。實與之同朝。夢炎自狀府君行。持來告曰。李翱有云。先祖有美而不知。不明也。知而不傳。不仁也。夢炎竊爲此懼。願吾子有以畀矜之。墓門有石。亦旣琢而磨之矣。濂不敢辭。銘曰。

剛腸斥邪。勁弗折。一見未語。心已惕。庶幾今逢古遺直。義聞如泉。漸洋溢。勸分有策。昭厥績。繡衣使者加薦辟。堅臥不起。志非激。膏肓久矣。榮泉石。少微星昏。風夜黑。白楊有祥。闕元室。孰不賈涕。何嗟及。有孫文章。成五色。君子於茲。觀世德。

南澗子包公碣

烏傷縣西四十里。爲南澗子所居。其鄉曰智者。里名修政。南澗子生於宋咸淳乙丑九月三十日。眉目秀整。倍書學文。皆過人。年五歲。見伯父記。飲中八仙及大歷十才子名。隨記隨失。南澗子牽衣問曰。翁何健忘耶。兒雖耳聞。已熟於心矣。因歷數以對。翁大驚。及長。銳然尙友古人。朝負未出耕。稍暇輒躬親。杵臼井竈之事。及入夜。方懸燈挾冊。琅琅聲不絕。終能暗誦春秋左氏傳三十卷。一字不遺。名動遐邇。閭右之族。爭聘致爲弟子師。南澗子專以講解章旨爲第一義。且曰。自先世逮吾凡十世。皆以教授學徒爲業。其所相傳。不過如此而已。弟子遵其教者。皆不悖師說。爲良士。性嗜酒。雖至百觴不亂。當酣適之際。岸巾獨坐。高歌八韻律賦。抑揚高下。音節極可聽。聞者猶能識前進風致。濂之祖太常府君。與南澗子相友善。嘗延於家塾。俾諸孫師事之。而濂甫十二齡。亦預其列。操觚賦詩。動輒十餘首。南澗子酷愛之。旣而濂以家單。

稍不事觚翰。南澗子移書於先君尙書公曰。公之子終成偉器。豈可使嬰世利而志不專耶。外物去來。猶春花之開落。唯問學乃身中之至寶耳。先君深悟其言。命擔簦遠游。至今幸忝簪纓之末。皆助導之功也。南澗子無機心。撫世酬物。洞達出肺腑相示。人無賢不肖。皆樂親之。壽七十二。以重紀至元丙子二月十二日卒。瀕卒危坐賦詩。有脫胎換骨之句。俄頃而逝。其年十二月二十四日。葬於家後五十步。祔祖塋也。南澗子諱廷藻。字文叔。自號南澗。姓包氏。出合肥孝肅公拯之裔。公之子綬生壽年。壽年生執中。初遷天台。執中生通直。再遷金華之松溪。通直生冀之。冀之生昶。三遷於今里。昶生凱。凱生震。震生文煥。南澗子父也。母盧氏。望江丞殷之女。繼邢氏。南澗子娶史氏。生五子。士瑞。士祥。士安。士梁。士華。孫五人。文貞。文星。文旺。文彬。文賢。士梁有學行。善繼父業。與濂。尹角締交。間以墓文爲屬。濂游宦南京二十年。久不克爲。今年春。蒙恩致政而歸。士梁復竭蹶而來。以申前請。近嘗謁拜墓下。寒草淒迷。徒增古今之感。乃書其所知者。以授士梁。不待狀之所具也。銘曰。

師道之立。善人斯多。奕葉傳經。無敢訛。才良俗善。資漸靡。何以表之。銘澗阿。

故紹興路總管府治中金府君墓碣并序

濂來浦江。聞縣有先達之士金公。歷官多異政。時公沒未久也。會邑令長請修圖經。縣之人物。法當登載。文下七鄉。徵其實。會公家有故。不於事來上。其詳無從知之。詢於大夫士。情之好惡不同。言又人人殊。不能聽。但略附公氏名他傳。至今以爲恨。後十有五年。公之子昌祖。始具治行。踵門泣拜。且謁銘。濂因得備



序之揭諸墓上。且使續縣志者有采焉。公諱德潤。字君澤。姓金氏。世家彭城。五世祖碩德。始遷婺之浦江。曾祖載。祖文興。父定。字正甫。雅好施。貸而不償。則裂或作併券棄之。以公貴。累贈奉議大夫。婺州路總管府治中。上騎都尉。追封大興縣子。程文憲公鉅夫爲銘其墓。妣吳氏。累贈大興縣君。公少有大志。不屑事耕稼。視其手曰。吾掌腴且厚如此。肯浮沈田間乎。年二十餘。遠游湖南。入憲府學書獄。客東廡下。中設木榻。旁餽益之。屬寢食於是。繙案牘於是。終日危坐。休沐未嘗出。時疎齋先生盧公塾爲部使者。每見人散後。唯公獨留心錄其勤。選爲潭州府史。公辭曰。明公不以德潤爲不肖。俾吏於潭。然潭之戶口踰五十萬。事必劇甚。非長才不足以任之。若區區者。得一閒曠之所稍讀律焉。則明公之賜也大矣。盧公尤嘉之。如其請。移桂陽。越二年。補湖南道憲府書吏。久之。遷湖北。贊使者發姦伏。聲達湖廣。行中書辟理問所提控案牘。以年勞及格。授台州路錄事判官。階將仕佐郎。豪卒質人珠。人贖焉。卒愛珠潔。意將乾沒之。給曰。汝何多忘。珠已歸汝矣。其可再乎。人訟於官。公訊之。卒諱如初。因去。卒巾跪於庭。使人持去。謂卒妻曰。汝夫令索珠。恐汝不信。特以此爲驗。妻視之。果夫巾也。啓櫝還之。卒大慚服。薛記擊陳源死。薛行賕上下。以勢扼諸孤。亟糞壅其屍。冤莫能伸。公白發之。歷二年。屍僵如生。抵薛於辟。辟浙東道宣慰司令史。考滿。擢將仕郎。平江路總管府知事。未上。江南行御史臺辟令史。以病足辭。尋之官。平江。轉承事郎。常州路宜興州判官。新學宮。築社稷壇。架長橋。民賴之。州多盜。公閱盜冊。察其尤醫狡者。鈇左右趾。役於官。三年之間。外戶不閉。建文會以激攻科目者。文既集。請名進士第。其高下。賞之有差。公去日。民爲立遺愛碑。改承務郎。

嘉興路總管府推官。屬歲大水，禾不登，道殣相望。其壯者謀曰：「吾儕等死耳，飽死可乎？」乃羣詣富人貸粟，弗從。竟囊之而奔。諸聚落皆然。縣州坐以強效。案且具。公原其情，悉傳以經典。脫死者六百。人民感泣曰：「推官生我，推官生我，拜而去。」已而足疾寢劇，遂上疏乞骸骨。以奉議大夫、紹興路總管府治中致其事。公爲人忠靖而慤勤，讀書至老不釋卷。當入吏時，操觚或不能成字。後解屬文詠詩，論議出入經史。蟬聯不少休日。以性褊躁，撫古之有容德者，成類各贊以詩。號曰「紀忍之書」。趙文敏公孟頫、虞文靖公集皆深有取焉。生平無他嗜好，視貨泉如土梗，唯愛聚書。多至七千卷。居家謹禮度，劇暑鏤金，不冠帶不見諸子。奉先恭甚。月旦十五日，必帥家人謁拜先祠下。撫嫗族有恩，嫁娶不足者助之。遇歲儉，割秩祿濟之。每思倣范希文買義田爲經久計，有志不就。其蒞官則清心寡欲，祿或不給，取貨於家以繼其用。惡豪強之蠹良弱，極力鋤剗。所至皆屏迹。人呼爲「健吏」。云：公娶王氏，累贈大興縣君。重配何氏，封大興縣君。子四人，長曰壽祖，以公廕授昌化尉。次卽昌祖，通儒術，能紹家學者也。次曰紹祖，次曰光祖。壽祖、光祖皆相繼卒。女一人，歸姑蘇鄭善孫。九人曰教化，曰不花，曰珣，曰琥，曰剛，曰忠，曰聰，曰滿，曰茅。孫女六人，其一適張輝。餘未行。年六十六，以至順四年二月十五日卒於家。十二月某日，塋於後金之原。嗚呼！公起於蒸庶，不從貨取，不從權勢而致，不從奔競阿附而獲，直以累積勞烈，縣歷歲時，而躋五品服。卒使澤加於民，聲流於時，榮號寵賁於先人，誠可謂難能者矣。銘曰：

健翮維隼兮，寧不奮飛。捷足維驥兮，千里以馳。豈阜樞之可淹兮，而鏃鏃之足羈。吁嗟夫子兮，其類是爲。

翩然高舉兮。物莫能駢之。命服斯皇兮。終易布章。聲號赫赫兮。如飈四馳。雖宰木之已拱兮。芬烈躬而未除。揭徽行於隧道兮。尙來者之可期。

故承事郎漳州府漳浦縣知縣張府君新墓碣銘有序

張之爲著姓尙矣。自軒轅第五子青陽生。揮爲弓正。觀弧星始制弓矢。因姓張氏。歷代以來。勳賢軒冕。未嘗乏人。其居饒之德興吳闡里者。諱鵬。仕唐爲節度使。至五季時。子孫猶授節鉞。宋天聖中。龍圖閣直學士燾。嘗同文潞公諸賢爲洛社耆英之會。暨還饒。見旁縣安仁有山名若嶺。林樾蒼潤。靈氣迴合。因移居其下。五世孫一清。中特科進士第一。與同邑湯文清公最相友善。推究經傳。反覆詰難。必得肯綮乃已。自時厥後。族日以繁。讀書之聲。琅琅乎西東。擢上第者凡十。預薦送者二十。又七。薦紳以爲榮。一清若干傳。至宣義郎某。宣義生某。舉進士。上南宮。歷斥時政之弊。有忤執政。遂下第。某生英。肥遯終身。飲水著書。以自樂。以春秋屬辭若干卷藏於家。英之兄國學上舍某。當宋錄將訖。帥安仁義師。從謝枋得勤王。及戰敗。家遂爲墟。英子禹受。方在幼。最號孤貧。後能遵廢舉之術。大振其宗。田貨悉逾於前人。初無嗣。育仲兄某之子瑛。爲後。年四十七。始生府君。府君諱理。字玉文。十歲通經史。十五能屬文。父悅曰。吾宗書種弗絕矣。爲築義湖精舍於室之南偏。聘明經老生爲師。遐邇之士。鼓篋而來。咸食飲之。由是游從者日衆。而府君聞見益廣。縣令長嘉之。旌其里曰儒賢云。府君以累世科名。欲起而踵其後。復往從廬陵王君充耘。習爲程試之學。較藝江浙鄉闈。不中。遂學詩於翰林學士承旨張公翥。張公見府君襟度冲曠。深器之。悉授以

詩家之法。府君寤寐不忘。虞文靖公集覽其所賦。擊節嘆賞不少。置至正壬辰。斬黃妖寇相挺爲亂。破饒州。已而安仁繼陷。殺戮到雞犬。府君攜家避去臨川。時江浙行省左丞老老公。江西行省丞相亦憐直班公。屯兵信之弋陽。營壘相望。府君請張世英請檄起兵。遂同弟球間道歸安仁。聞外孫陳政養甲士三百爲自衛。府君召政與計事。命伏兵於戶內。椎牛釀酒。誘僞帥二十四人。醉飲於庭。縛送於官。斬之。復諭其部曲曰。爾帥已成擒。卽宜改圖。稍緩。成菹醢矣。衆翕然歸。乃研墨汁。署其衣曰。興安義兵。二日之間。得健兒四千。金溪白砂盜周謙。入境抄掠。府君命球將健兒往逐。斬首數百。尋殲之。白砂盜平。丞相出兵平饒。號一十萬。至貴溪。球以兵迎。一鼓而安仁復。球受命攝縣事。僞將軍彭浩。擁七萬衆。逼丞相於團湖。丞相兵欲退。球部騎卒執麾前驅。丞相遽下令出戰。浩大敗。斬首三萬級。積屍如山。球導丞相前進。復饒州。軍士乏食。且重以疫癘。府君率縣大姓輸糧一萬二千斛散之。時寇盜充斥。南通閩。北適燕。唯安仁爲便。使者乘傳而來。絡繹不絕。皆仰給府君。家爲之貧。江西劇盜黃廉舉。猖獗不可制。左丞火你赤公檄球共平之。府君授球計。焚其窟穴。賊遁去。別據岩險爲拒守。設伏於道。球乘勝深入。賊突起而蹙之。球力鬪而殲之。府君失聲哭曰。折吾右臂矣。吾當上告方伯。以復爾仇。下命介子。以奉爾祀。庶幾盡吾心爾。遂急攻廉舉。廉舉懼。別降江西行中書。未幾復叛。府君與王伯美夾攻。大敗之。殺其兄廉靖。廉舉夜走慈溪。吳友文械送府君。獻諸幕府。屍於市。且求殺球者五人烹之。而以中子爲球後。里歲儉。人多相食。府君移粟以賑。仍禁山谷氓勿出鈔。道商賈懋遷如承平時。四方辟地者三百餘家。皆依府君以爲安。五年之間。號爲小康。

辛丑歲八月。天兵取九江。九江與盱江連。府君知天命有所屬。往贊其守臣王公溥。以全城內附。皇上召府君至南京。擢知徽州黟縣事。黟在萬山中。自近代來。高陵鉅壑皆有賦。民不堪命。會部使者至。府君力陳之言與淚俱。使者以其事聞。下營田司核實。惟田輸糧。餘皆置不問。黟民得以少舒。秩滿。改知漳州漳浦縣。及行。民爭擁馬。垂泣而送之。漳浦接連溪洞。民善亂。舊於其地置汀漳屯田萬戶府。及入職方。詔徵屯田軍赴京。萬戶吳世榮遂叛。府君集民兵攻世榮。戮之。具上奏。中朝免其徵。海寇林仲明。鄭惟明。鄭君長。恃能出入海濤。先後爲背叛。漳州衛兵雖嘗剪除。而渠魁逸不可捕。府君悉用謀致之。磔裂以徇。民畏威。不復敢爲亂。俗尙妖術。呪物食人。久則成形於腹中。物動人輒死。云役其魂爲奴。府君廉知之。毀其淫祠數十區。其害遂熄。邑多良田。其隄防爲潮水所齧。鞠爲草萊之區。府君修築之。百里之間。皆化爲沃壤。土豪羅季。二族黨與甚衆。恆持官府短長。府君徙其家遠方。事始帖帖。府君且謂蠻夷不知禮義。無善教。以牖其良心爾。乃爲修學聘師。集子弟而訓飭之。三年之間。政教大治。府知事孫希顏嘗有求而弗獲。及以賊墨敗。誣府君以白金百二十銖爲贖。刑曹逮府君。坐以不宜與。事已釋。將趣裝南還。忽遘心疾。恆怛怛若絃。目不暇瞬。遂卒。實主於江寧樂氏。其時則洪武五年三月五日壬子也。年五十九。同門友夏君通爲稱貸。襲斂。以某月日權厝於聚寶山。府君娶臨川王氏。出荆國文公之後。吉水州判官某之孫女也。先七年卒。子男尙德。次九德。卽爲瑒後者。次報德。女常德。適臨川許觀。孫男三人。桐。木。東。府君天性孝友。父病亟。夙夜顚天。祈以身代。仍剖股和藥以進。疾乃瘳。後二年卒。事兄瑛。唯恐弗獲其驩心。然操履剛介。不

諧於流俗而非義之財。絲髮不取。故居官之日。命其子負販以自給。及其歿也。橐無一錢。識者頗哀焉。瀟爲左史時。見府君清溪上。府君方以意氣自豪。醉墨淋漓。有鸞踏鳳翥之勢。頗異其爲人。自是數與之游。暨別去爲縣。聲跡不相聞者六七年。遇與府君交者。輒詢之。皆不能道其詳。今年夏。忽有衰絰踵門者。則府君之子尙德也。驚而問曰。府君死且殯已逾月矣。嗟夫。十數年來。朋舊凋落殆盡。如府君康強者。亦復棄去人間世。則夫沈酣聲利。自恃以爲久長者。果何如也。因爲泣下數行。旣而尙德將奉柩歸故鄉。以某月日。葬於某山之原。持夏君所狀羣行。請爲文勒墓上。濂。府君之友也。不爲之銘。孰宜爲之銘。銘曰。維其文。五色細縑。揚葩而吐芬。維其武。扼彼妖旅。退縮莫予侮。維才孔臧。曷施弗良。維邑之試。變劇如易。維澤之滂然。維民之靡然。維聲之鏘然。維神之難言。胡不永其延。吁嗟乎賢。吁嗟乎賢。

故龍南一峯先生鍾府君墓碣銘有序

府君諱柔。字元剛。姓鍾氏。其系出於魏侍中繇。繇之十代孫紹京。字可大。事親孝。自爲童時。凡得瓜果必先進。最工書。人號爲小鍾。蓋以繇爲大鍾也。嘗直鳳閣。後從唐元宗平內難。拜中書侍郎。始居贛。其諸孫曰某。游宦龍南。復爲龍南人。傳至諱佑。字少游者。擢元豐五年進士第。歷二廣轉運使。以功烈聞。性尤至孝。父歿。哀慟擗踊。聲不絕於口。羣烏助之哀鳴。人爲建感烏堂。府君則其裔孫也。曾祖濬。祖德賢。皆抱道潛耀。以自樂。父克俊。在宋之季。補國學上舍生。聞三宮北遷。糾集義旅爲勤王之舉。勢旣不可爲。乃登贛之馬祖岩。遙望中原。白雲渺瀰。而翠華不可復見。悲歌激烈。聞者涕下。已而痛憤益深。誓不食元之粟。賦

詩一章。有自許有身埋漢土。終憐無淚哭秦庭之句。遂赴龍頭江而死。其忠義之志蓋皦然云。府君生甫一歲。宋初改物。兵燹猶未息。祖母吳氏與其母劉夫人挾之走南雄。艱難險阻。莫不備歷。府君幸既長。俾歸從鄉。先達雷州推官劉公震游。夫人日自程督之。府君性既穎拔。復知以紹述爲事。昧爽卽興。挾冊映簷光而讀。至夜漏下二十刻亦弗休。由是融貫於經子史集諸家。握筆爲決科之文。頃刻千餘言。長風驅濤。而雷電與之相後先也。夫人喜曰。吾有子如是。吾夫子爲不亡矣。夫人或與府君語及龍頭江事。府君輒長號弗輟。幾欲無生。及祖母與夫人相繼而逝。府君竭誠於墓祭之禮。觀者咸曰。鍾氏世有孝子。感烏堂之作。不得專美於前矣。府君初娶田州判官凌君昌任之女。生一子而卒。興寧尹馬君良奇。府君之爲人。復以女妻之。遂同之官。凡馬君之善政。所以鋤姦扶懦。滌冤疏滯者。皆府君有以發之。廣東帥闡及海北廉訪使者。聞府君學行之懿。交薦之。署爲雷州路學正。府君以海濱非久處之地。力辭而歸。下簾講授。從者數百人。咸共推尊之。號曰一峯先生云。府君儀觀偉然。終日正襟危坐。人莫能窺其際。晚益刊落英華。窮極根柢。所居僅蔽風雨。所入僅足饘粥。而處之怡然。至於赴人之急。雖蹈水火有不暇顧者。君子尤稱之。府君生於至元丁亥正月某甲子。歿於重紀至元辛巳十月某甲子。得壽僅五十有五。瀕卒無他言。唯屬子力學厲行。毋墜家聲而已。所著書有諸經纂說。易書詩衍義。弊帚集。若干卷。藏於家。府君凡三娶。初凌氏。生一子。卽恕。字以行。至正癸巳鄉貢進士。署濂溪書院山長。不赴。次馮氏。無子。次凌氏。生二女。一。早世。一。適凌德祥。孫男三人。曰肅。曰緝。曰熙。女一人。適某。曾孫女二人。尙幼。府君之卒也。塋於龍山之南。

洪武庚戌秋八月某甲子再遷於仙女湖之西與凌氏合葬焉實縣南之五里也。惟府君生於忠孝之門耳濡目染已能力乎其大者及求諸六經驗諸躬行所見益真切所獲益粹凝雖不見用於時而弟子從之者皆知所謂孝悌忠信其有功名教甚多是亦爲政也。中州君子恆言虔南爲遐荒之地賢才鮮少。有若府君者其裔胄之悠久家學之盛著文行之隆蔚初亦何減於中州人之好論議往往如是是重可嘆也。因按鄱陽董先生之狀大書以銘府君之墓庶幾白府君潛德於遠邇虔南之士讀余文者亦當有所奮勵而興起焉。銘曰。

嫩人之班班乎而忠信以爲冠乎而佩純知而擊華文乎而光彩之如瑞乎而長才詘而弗信乎而陳政令而屏妍乎而柔之立而強之刃乎而臯比設而師道尊乎而反澆涼而爲龐惇乎而一鄉之善士質其玉溫乎而岐有鳴鳳魯有祥麟乎而天之生賢無方何暢復何屯乎而勒銘墓門乎而庶昭昭其永聞乎而。

故樓景元甫墓碣

禮有之凡有道者有德者使教焉死則以爲樂祖祭於瞽宗此之謂先師若漢禮有高堂生樂有制氏詩有毛公書有伏生之類是已嗚呼古禮不行久矣今之所謂鄉先生者得不近之歟鄉先生謂誰烏傷竹山里有樓君景元以書詩教於其鄉景元日坐臯比申飭五倫之教壺簞不自休受其學者攝其惰疎歸於密微必充然有得而後止父旣師之其孫又繼之其孫又執經從之先後垂六十年環境之內外率皆



其弟子矣。於是相與謀築書齋一區。以爲講授之地。暨歿而塋。號泣而執紼者數百人。咸曰。吾先生亡矣。何所受業而辨惑哉。觀者歎慕而去。初。景元之父玉汝翁。習六藝而文。景元幼服家庭之訓。長益自振厲。從淵穎先生吳公立。夫爲科目之學。未幾棄去。而專攻羣經。間發於詩。亦首尾開闔。皆中矩度。名著遠近。縣大夫或出鄉。咸望闕款謁。詢以民間利病。必懇懇縷陳之。乃已。景元性誠懇。事親能盡其養。親死經紀喪事。不以煩諸兄。諸兄性方嚴。景元承事惟謹。迨至分田。唯受礪瘠者不辭。其後兄子有黜其業者。爲贖而歸之。且曰。烏可使其無食也。遇族媼故舊。一以誠相接。無一毫狎昵態。晚歲頗好神仙家言。杖策游江東。登龍虎名山。騁目遠望。脩脩然獨立物表。意謂古仙人或可見云。洪武七年甲寅十月十一日。以疾卒於家。年七十九。臨啓手足。無他言。唯戒諸子以守詩書之澤。使勿墜。九年丙辰正月六日。奉柩葬於梅口山先塋之次。景元諱光亨。景元字也。姓樓氏。樓故爲宦族。宋嘉定癸未進士。通判吉州元齡。其四世從祖也。曾大父炎。大父建中。父有成。無爲路儒學錄。卽玉汝翁也。娶劉氏。有婦德。濂嘗爲銘其墓。男子四人。女子四人。孫男三人。孫女四人。名皆具前銘中。茲不書。濂今春蒙恩致政而還。羅山。景元季子仁壽。縣主簿。璉。件繫羣行而來。請曰。先夫人之終。辱先生賜之銘。甫及二載而先君又卒。先君平日嘗言。知我者唯太史公宋君。我死若求文鑄墓上。吾瞑目矣。用是不避譴呵。重有所瀆。願先生進之。濂之先廬與景元密邇。而景元長濂僅一十四歲。相與論文甚驩。聞景元死。涕落不能收。近雖老病。四方求文者。類多峻辭。其於景元可得而忘情乎。若吾景元。生能執詩書之業。以淑諸人。誠無愧於鄉先生者。死雖未及祭之於社。銘

以列之。豈過也哉。銘曰。

一卷之書。必立之師。牖民孔易。斯德所歸。懿哉樓君。侃侃泰儀。執經據座。析分毫絲。環而聽者。肅其冠衣。聚精會神。臻於泰熙。春融天衷。蟬蛻人私。俗變淳龐。實由於茲。生服明訓。歿寓哀思。有素者冠。溢於中達。彼位崇階。澤不下施。人孰無舌。不一道之。太史造銘。公厥是非。觀者宜式。知無愧辭。

故諸暨陳府君墓碣

惟陳氏遠有世序。其先居襄陽之宜城。有諱璿者。生磐。磐生斌。斌生旬。旬生宋國子助教旦。始自宜城徙杭之萬松嶺。旦生慤。字公實。有文學。一時名人如范元卿、陸務觀、辛棄疾、咸與之游。論者謂其氣節度量。有郭元振之風。官至承事郎。知餘姚縣。復自杭徙諸暨陶朱里。慤生樵。樵生載。又自陶朱里徙開元橫山之西。載生國子監主簿瑞。瑞生岳。岳生清。清生德興。字克明。從子洙。嗜學。如不及。克明資之。使受經名師。食或告絕。躬事杵臼。市米以遺之。卒成鉅儒。克明娶曹氏。生府君。諱大倫。字彥理。自幼岐嶷。學易於洙。既而更春秋。年甫踰冠。敷釋義例。揮毫輒雲烟滿紙。自度功名易如拾芥。屢試藝場屋。不能中繩尺。悲曰。吾文視舉進士者何遠。今不與之並驅。造物困予矣。將何言。於是棄絕。益攻古文辭。浦陽淵穎先生吳公萊。以奧學雄文知名當代。府君從之講學。下及秦漢。以來諸文章大家。章有其法。句有其旨。青燈夜懸。或至達旦不寐。府君之學大進。遠近欣豔之。交聘爲家塾師。留富春山中者最久。富春右族多負氣善鬪。府君周旋其間。每以訟終凶爲戒。言辭悃悃無華。聞者皆心醉。俗爲丕變。馮士頤將合族爲義食。不問毫倪。一

聽府君言。府君量其可行者。樹規約如干則。防範甚密。其家賴之。狂士吳子中文而好訐。斂怨于鄉。羅山人集亡賴男子。縛致幽室。將撲殺之。府君徑趨山人家。揚言曰。爾曹欲殺吳子中邪。子中無大罪。豈可以嫌隙之細。遽害之。具耳目者恐不爲也。吾當白之於官。山人聞之懼。解縛與其俱來。伏地謝罪。府君諭遣之子。中因得不死。元季兵亂。江浙行中書徵兵儲於饒。饒之判官方沂。實部其凡。及押運吏入江。爲敵人所襲。上官將致辟於沂。逮捕甚急。沂潛往見府君。泣訴其故。抽刃欲自刎。府君奪其刃。藏沂山澤間。具解之曰。兵儲之失。罪在押運吏。判官何與焉。尋獲免。沂見府君。跪而語曰。生死肉骨之恩。隕身不足以爲報。府君張目大言曰。方判官乃以市道交我乎。沂不敢復言。府君知時事不可爲。遂絕意仕進。時江南行御史臺移治會稽。中丞吳鐸。監察御史督烈圖王偲。競欲挽府君於州縣文學掾。府君力以疾辭。且策西師。旦夕必大至。決不暇安居。乃遁鄰縣之東陽。已而果然。諸暨下。高郵樂鳳來爲州。與李參軍希白謀迎還府君。以事師之禮事之。州兵爲變。鳳與希白皆被害。府君又避入流子里。流子里在州東長谷中。府君當兩山夾澗。作晚香亭三楹。間日與賓客暢飲爲樂。酒酣。府君捉筆咏詩。脫帽高歌。擊几案爲節。座人每爲絕倒。或氣候和適。戴華陽巾。服寬博布衣。支筇行古石細路間。遇泉石佳處。游目思視。意若與之相忘。人問其故。府君嘆曰。吾生平無他嗜。唯攻文成癖。孳孳矻矻。垂四十年。昔之人如此者何限。今皆安在哉。每搔首自傷。但得適意時。竟與萬物齊冥。當不計有明日也。識者服其曠達。後三年。以疾卒於家。實吳元年十一月二十一日。享年七十七。二月十八日。葬於某鄉呂塘之原。府君娶樂氏。生二女。適傅某。胡驥。繼配。

張氏生一子。瞽。善古文辭。能紹家學者。孫男五。可牧。可蕪。可農。可仕。府君長身美鬚。性坦夷。吐言露肝膽。雖髮已斑白。手不釋卷。天文地理。老釋氏之書。莫不攬其英華。尤善寫竹樹。蕭蕭有蒼勁之意。寫已競取爲清玩。所著書有春秋手鏡。尙雅集。各若干卷。尙雅。蓋府君之自號也。府君歿。其友張辰。旣狀其行。復慨然謂人曰。府君之才之美。設用於時。當無適不宜。奈何斂財操勢者。銖黍不合度。輒斥而不取。遂俾甘心丘壑。老死而不悔。甚可謂當世有司弔若府君者。無榮無辱。全其所有。而歸於造化。奚翅足矣。尙復何說哉。瞽持狀來徵銘。濂雖素知府君。未必有加於辰之言也。謹備識之。而爲之銘。銘曰。天之夢夢。孰得而倫。賦才孔多。乃卒堙淪。保偏夫君。纓蕤之門。風措孤蹇。所凝者神。五彩成章。隨氣吐吞。其光爛然。可燭翳昏。鬱而弗施。結爲氤氳。彼狂者生。取尤於人。將扼殺之。不翅孤豚。奮襁一呼。兇徒褫魂。有友跼危。逮者星奔。將蹈白刃。誰欲命存。匿之山樊。慰言復諄。平脫其生。矢不以恩。少見事爲。已復有聞。假使大用。何物不春。惜丁亂離。戎馬紛紜。鸚書雖上。荷衣莫焚。笑咏烟霞。傲睨乾坤。時命所拘。有志弗伸。七尺之墳。呂塘之原。昭懿廓潛。太史有文。

故廬陵張府君光遠甫墓碣銘

皇上卽位之五年。朝廷清明。百揆時敘。乃闢文華堂。禁中妙柬英才。詔詞林羣公分教之。車駕幸臨。閱其所業文。親定優劣。上德至渥也。時江西張唯。流寓河南。以尙書領首薦。會試南宮。未幾。除國史編修。仍俾肄業於堂。余見唯。有雋才。特請於上。錄爲弟子員。唯執經日久。忽歔歔流涕。言曰。唯父抱奇節。不幸沒於

盜手今體魄入土而墓石無文一念及茲將欲無生惟先生矜而畀之余按亡友吏部員外郎周子諒狀君諱遠字光遠姓張氏吉安永豐人氣岸豁達不狃於小物當元之季大盜起沔陽蔓延江右陷吉安既而州兵搗走之盜所過井落民皆相挺爲變殺掠巨室慘酷不忍聞君怒髮上指日夜建奇策剪寇其友羅惟遠者尙氣節遣人夜致之列酒炙於庭脫冠酣飲夜將半屏左右跪而告曰吾州素號文物之邦一旦盜蹂踐將無遺義不與賊俱生然非公不足濟吾事今郡守梁使君出督兵境上公宜往請師吾陰立部署以候斫賊無難者羅抵掌於几曰子誠奇男子吾縱無他能敢不從命議既定君冢子庸猶未知君乃叩寢門令出拜復語之故庸曰羅先生若迎官兵至庸持大斧盡殺狐鼠輩不留一人羅舉觴賀君曰大兄有如此豪傑兒事不患不成也未發寇謀知之帥衆執羅去裸而鞭之且問曰誰與汝造謀羅罵曰死狗奴吾情汝不道自欲殺汝何暇與人謀哉賊怒愈鞭之仍授紙筆使寫首謀者名羅瞋目視之大書一死字賊反接羅於樹剖其腹作小竅日增加之羅嚼齒大罵三日而後氣絕將絕罵聲猶含糊在口君幸得脫走吉水及寇勢稍戢君還故里寇有知君遣羅事者繫之至營賊競來指曰是嘗欲殺吾屬者君顏色自若從容語賊曰我纓綬之家決不畏死喪節殺即殺何以多言爲遂遇害賊黨忿猶未平并欲屠君介子賢渠魁執不可慨然嘆曰彼固忠義人也寧可使其不血食耶爲具棺斂使歸葬里之桐塘聞者莫不實涕君博通經史篤風義事親以孝聞豪石以科繇困之君奉親避去旁郡不遠百里負米以爲養暨歿號慟幾絕者數四然疾惡如仇閭師有貨粟多取息者勢橫甚君面斥其非直於州縣閭師恚欲夜

擊死君。聞州里萬口交譽。不忍發而止。賓客至門。傾有無相接。劇談古今事變。二千年間如玉貫珠。聯客爲之傾聽。忘日之夕。且曲盡物情。三尺童子。上謁亦以禮受。未嘗少忤。性不嗜貨殖。或勸爲孫子計。君笑曰。能守先業亦足矣。何以多爲。君子稱焉。壽五十四。遇害於至正戊戌之正月。其日不可復知。自桐塘改墓於大塍之原。則洪武辛亥八月某日也。君配劉氏。輕財重義。有顛連者。解衣推食無吝。亂離後家單。每嚮。斂鈿助夫賓客費。後君五年卒。子三。長卽庸。次卽賢。有膂力。能馳馬奮槊。千人中。後十一年亦卒。季乃唯。新擢今官。女三。俱適士族。孫三。憲、文、昌。女二。在室。曾孫一。祺。君之系。出自唐曲江公九齡。九齡元孫洪州都督參軍景重。始來江西。參軍曾孫箴判虔州洪。字宏淵。復遷永豐之杏園。代多顯官。至君曾大父元升。大父瑞伯。父亨。雖曰不仕。咸能世儒業云。嗚呼。士氣弗振久矣。當楚氛膠葛之時。爲二千石者。曾不一舉手障之。寇至。輒俯首遯去。日行百里。惟恐不疾。誠女婦留鬚鬢者。也有如君者。藐然一布衣。無社稷人民之寄。乃能建策殺賊。不幸事不成。雖肝腦塗地而不悔。豈非烈士也哉。羅氏能從君謀。身可殺而志不可奪。亦可謂慷慨之士。取友之端。又於君見之。嗚呼。志莫大於殄寇。義莫重於捐生。此而不銘。惡乎銘。銘曰。

元政陵夷。盜起楚區。絳巾嘯呼。毒氣所侵。盡其良心。棄鋤握瑾。叶。瞻茲廬陵。羣邪沸騰。千里血腥。有夫桓桓。髮上指冠。誓除暴殘。夜則枕矛。血淚交流。同志之求。酣歌慷慨。舞劍欲狂。惟籌之良。彼何昏昏。漏師弗懲。賊我良朋。正氣凜然。雪爲不寒。欲膾盜肝。君亦被拘。冒盜益奇。以死殉之。雙壁焜煌。如星吐芒。照耀四

方君名巖巖。重如泰山。一死亦安。史官造辭。鑿於幽墟。後世是師。

### 傅守剛墓碣

自焚屍沈骨之俗成。雖纓弁之家。亦靡然從之。魚爛河決。不可救藥。君子每爲之太息。有若傅守剛之事。其可不表之以厲人人乎。守剛之父歿。其諸兄具棺斂。已舁出中野。縱火而蒸之。守剛勢不能止。哭踊將絕。燕已。編荆成筐。實以象泉。拾遺骸以歸。守剛欲夜半持去。會守者嚴。不果。明日。諸兄捧筐至大澤。而投清泠之淵。守剛尤痛憤之深。俟諸兄還舍。解衣入淵中。且泣且拾。堆寘沙上。脫所服縕袍裹之。奔告於先子尚書府君。府君命留閒房中。設几筵。使其父之友賈明善徵木。造小櫬藏之。適堪與家趙翁自城南來。憫守剛之志。爲擇地一所。守剛備書而買之。負土成墳。手藝松柏於四周。其兄怒。以其辱先也。欲發而出之。予仲父文友君將挈守剛訴縣。乃懼而止。至今松柏蓋鬱然成林云。守剛諱致柔。守剛其字。余之所命也。傅氏金華好善里人。曾大父某。大父某。父肖說。皆農家。守剛年十二。始入小學。時牧牛山澤間。輒挾書誦不輟。洎長。登貞文先生吳公立夫之門。當是時。來受業者多貴人家子。車馬焜煌。冠服鮮麗。煜然如神仙。守剛麻衣菲屨。廁其間。怡然無難色。日受公教學。識益凝定。出言必思力踐。蓋粹然儒者也。間出爲詩。若文。亦光潤可觀。父病。守剛往致醫。溪漲不可渡。守剛立水濱。終日望天而泣。或憐之。以大纆貫腰。挾之以渡。醫見其情。辭悃款。惻然與之還。脉已曰。此天相孝子也。稍緩一夕。疾不可爲已。藥之。瘳。守剛諸兄不知書。競割戶自私。先業恣其取。不與較。守剛貧無所於歸。出爲閭族童子師。久漸能自存。遂娶天台王教。

授某之女爲配。年過四十，生男鵬鵬，絕愛之。頃刻不見鵬鵬，意輒不懌。時撫鵬鵬頂曰：吾之命其繫於此乎？吾卽死，不爲餒鬼矣。余家潛溪，抵守剛所居僅二里，每遇正月一日，必來謁。數年之間，風雪不易也。家人每具饌以俟，且曰：傅守剛其將來乎？言未旣，守剛坐廳事，作警歎聲矣。爲之失笑。守剛忽謂余曰：致柔老且死，鵬鵬眉娟好，似能讀父書，果如是，目瞑九泉下矣。予自後移家浦陽青蘿山，出仕於朝，入翰林爲學士，久不知守剛死生。洪武十二年冬，余還金華省先墓，忽有白面少年拜於庭，問其姓名，曰：我鵬鵬也。曰：爾何爲服衰麻乎？曰：先人不幸，以今年春二月朔死矣。問壽幾何？曰：六十又七矣。曰：葬乎？未也。曰：死後一月，權厝家西東阜之原。曰：爾今同處者何人？曰：先母卒二十年，女弟鸞亦歸童某，今獨侍繼母章氏以居。且曰：汝頗知學乎？乃袖出詩文一鉅軸，及用經史事廣李瀚蒙求三帙以進，予讀之，見其遣辭豐縟，而考事綜博。嘆曰：守剛有子矣。余旣歸蘿山，鵬鵬持其父門人童徽所爲狀來請曰：先人制行一出於誠慤，聞人善不翅若己出，見人爲惡輒攢眉而避，并日一炊，啜白水以代羹。若享太宰，鄉人咸以爲賢。部使者潘公輔聞而薦之，先人以疾辭，卒落魄不偶以死。臨死，執鵬鵬手泣曰：吾生無功於時，死當擇不食之地埋我。宋先生最相知，得一銘勒諸冢上，不翅足矣。言訖而終。唯先生憐而遺之，嗟夫！若守剛者，安可不表之以厲人人乎？爲之銘曰：

守也篤，特立乎獨，不受變於俗，是謂躡君子之躡。



烏傷之赤岸。有望宗曰朱氏。出於漢槐里令雲。槐里七世孫晉臨海太守汎。實自平陵來遷。臨海之孫東陽太守恒。東陽之孫金威將軍禮。亦皆仕於晉。至金威之曾孫幼。始事齊。歷守高辛、平昌、淮陽三郡。轉揚州刺史。揚州十四世孫某。有四丈夫子。生十八孫。知其後必蕃。而患無以爲之徵。周廣順間。迺治鐵作羅漢像。人授其一俸。散居州境中。若今赤岸。則其一族也。七傳至三府君良佑。益以建善。惇業繼其宗。府君生宋鄉貢進士中鄉貢生元。贈朝列大夫。同知台州路總管府事。騎都尉。追封沛郡伯。杓。沛郡之子。則朝列大夫。婺州路總管府治中。致仕叔麒也。初。縣之先達徐文清公。受業於新安朱文公。而鄉貢君乃文清之高第弟子。三世父子遞相傳授。辨析名理。密於牛毛。治中君兼以文辭馳騁於當時。人讀之者。若窺古鼎。鍾雲雷之文。不覺改容易視。公諱同善。字性與。沛郡君之孫。治中君之子也。賦質迥拔。日涵濡過庭之訓。學識所至。如春芽怒長。月異而歲不同。宿學之士。皆讓莫敢與爲敵。時鄉先正文懿許公。講道東陽八華山。復執經往從焉。文懿之學。上承文公五傳之緒。味道之腴。尤爲鑿飶。公質其異同。統宗會元。凡天人性命之本。禮樂刑政之原。古今治亂得失之迹。莫不洞該而參貫。建其所自得。神融心悟。不翅酣飲上尊。而行吟春風之中也。會科目法行。有司強起公以應書。不合。輒棄去。遂做太史遷爲汗漫游。涉大江。沂黃河。東歷齊魯之郊。北抵燕薊。所過古遺跡。必徘徊瞻慕而不忍去。或發爲嘯歌。叩轅爲節。以和之。暨至京師。諸公貴人爭相邀致。而越王聘之益力。遂授經於其府中。久之。思南歸。同邑黃文獻公。時爲國子博士。留之不可。檄公補廣東憲府掾。弗赴。僉宣徽院事。濟南韓公尤器公之才。行。辟爲兩淮屯府幕屬。赴官未

數月復謝去。退隱丹溪之濱。遠近生徒嚮風奔附。戶外之屨常滿。公隨其齊量。左右翕張。各使之充足而去。既老。涵養之功愈密。四體不待羈而自協。清明在躬。播爲大和。薰蒸所及。物無悖戾。迨將終也。絕無但化之意。咏詩二章。默坐而逝。春秋六十九。實乙巳歲春二月三十日也。夏四月九日。遂窆於鳳林山原。禮也。公篤於倫品。事親從兄。撫姻族。接僚友。皆可以無愧。晚復繕治諸冢舍。而刻家乘成書以傳。然其局度凝恪。處事寬舒。而自然中於肯綮。略無窘澁之態。學者因稱之爲裕軒先生云。娶卜氏。先二十九年卒。或勸公更娶。公笑而不言。蕭然一榻。人不能堪。公安之。教二子世濂。世沅。爲佳士。世濂問學蔚茂。文燄煌煌。起東南間。以薦者授釣臺書院山長。女文楣。適前承務郎温州路總管府經歷補陽鄭泳。亦以文學鳴。歲時來會。公坐堂上。子若壻旁侍。問答經義。金春玉應。聽者欣欣忘倦。君子歆豔之。孫棟亦嶄然見頭角。某在幼。先治中君羣從兄弟。宋季以進士起家者八人。聲名文物。見重於一時。議者以公所蘊方之。蓋甚無忝者。顧獨潛處而弗耀。咸噴噴痛惜不少置。殊不知世都重位。天也。而身載明德。亦天也。位能澤物。固顯矣。德則可以淑人心。可以善來學。庸非顯之尤者耶。天之於公厚矣。仕不仕不足爲公憾。濂游公之翁季間者久。何敢讓知。世濂以墓文爲屬。乃序次而銘焉。銘曰。

大道磔裂。士習汙只。尋聲接迹。曲且紆只。考亭之學。闢九衢只。前徐後許。直以趨只。機籥啓祕。激不認只。日月行天。耀經畝只。誰其繼者。丹溪有朱只。重徽疊照。契德符只。公生其後。類神駒只。振迅千里。流電徂只。視彼蹇乘。徒崎嶇只。終日不越。州與閩只。揚颿大江。涉青徐只。泰山高峙。河流殊只。元化紛縕。塞八區

只仰觀俯察。理則孚只。歸來故居。恆著書只。直自關洛。窺泗沂。只下視利祿。乃其粗只。少微星隕。人嘆吁只。著辭較德。勒碣硤只。白石可泐。其名弗渝只。

### 北麓處士李府君墓碣

處士姓李諱士華字庭實北麓其自號也其先家廬陵唐開元中遠祖德靈仕爲撫州長史因居屬縣之崇仁高祖昂宋太學上舍生曾祖緘以春秋舉進士至某官祖适父元德母盧氏處士賦才瓌異音聲如鍾幼喪父母二兄亦早世時當宋季亡賴男子學弄兵於村曠暮夜擊人門鈔掠其貲財以去稍與抗直刺以刃處士能自衛卒免其患會宋亡爲元更易方笠窄袖衫處士獨深衣幅巾翺翔自如人競以爲迂處士笑曰我故國之人也義當然爾府君善治生未幾家大穰遂以貨雄鄉里積粟歲至數千廩遇饑則平價出之饑餓不能出戶者計口而周之活者恆百餘人宗嫗無業班財以爲饋死則給棺槨衣衾葬之善地且卹其遺孤唯恐不及負逋不能庚者苟有所乞輒再與未嘗有靳色或以田廬爲償處士正色責之曰先人之業何可廢壞逋尙可紓也愆而遣之伴有盜廩粟者矜其貧益之使去識與不識咸目之爲仁厚長者云會朝廷有鬻爵之命富家兒多競奔處士恬不以爲意客以空名告身來售處士曰吾愧不能以文學干祿位而涉銅臭之譏雖貴奚益哉府君性純孝能事繼母如親母雖其性剛嚴不可近必下氣婉容得其驢心而後止常以不及終養二親語或臨之輒嗚咽流涕晨昏必展謁先祠遇初度之日號慟抵暮家人不忍見因諱言之訓諸子以學親自督視不至夜分不休也爲人豁達大度不少貶以狗流

俗見假巫鬼惑人者力斥去。鄉人鬪爭斷斷然正讜。折以片言。則免冠頓首謝。嘉賓款門。倒屣出迎。驩然無倦容。雖不解飲。必使盡醉而去。元至正十一年辛未正月五日。以無疾終。壽八十六。後二十二年。當國朝洪武五年壬子。葬於縣之大龍山之原。娶郝陳二氏。子四人。彬。鎬。蕃。鎬。以文行舉於朝。擢國子正。女三人。丁師周。晉戴尚德。其壻也。孫三人。誰家奴。寶定。孫女三人。尙幼。曾孫二人。宜壽。普蘭。曾孫女二人在室。自夫仁厚之俗衰。學者慨想三代之盛。猶神龍游於太虛。欲一見之而不可得。嗚呼。豈其然哉。人有古今。心無古今。有如處士之行。如前所載。苟謂之三代之民。孰不謂然。處士不可作矣。予故特表出之。以勵夫人人。然而仕之與否。是有命也。不必爲處士惜也。銘曰。

祥麟威鳳。隱而弗彰。苟一出焉。是爲希世之祥。謂之有邪。則固不能以亟見。謂之無邪。則簡策所紀。何爲其周且詳。吾謂處士爲三代之民。亦是類耳。世之人無徒委之於渺茫。緬懷德人。中心孔傷。今其已矣。何日而忘。

故務光先生張公墓碣銘

公諱明卿。字子晦。姓張氏。其先出於晉公族解張。因其字張侯。故後人以字爲氏。譜家謂軒轅之裔爲弓正。而賜姓爲張者。殆非也。子孫家於臨濮。世有聞人。至宋龍圖閣直學士燾。位望尤顯。元豐中。退居於洛。時年七十。同太尉文潞公。司徒富鄭公。爲耆英之會。洛中相傳以爲盛事。龍圖之弟正議大夫協。建炎初。扈蹕南渡。遂爲天台人。協生武節大夫挺。挺生竹山尉鉅。鉅生某官懋。懋生某官述。述生某官伯熾。雖三

世仕不甚顯。而皆與有祿食。伯熾生榮。榮生莘夫。字某。隱約田里間。能以詩書自振。逮入元朝。用薦者爲鄉郡儒學正。則公之父也。公始成童。而學正君卒。卽知家學是荷。朝磨夕淬。期以自立。弦齋林氏。素心邵氏。皆鄉先生行。公執經往從之。反覆詰難。愈出愈新。二氏方毅。靳推與。咸曰。張氏有子矣。至大間。有詔求直言。公慨然爲政事書一卷。將渡大江。凌黃河。以獻於朝。旣而嘆曰。吾爲生民計耳。不知我者。以其爲干祿乎。盡止之。於是南還。而教授里中。終日儼坐。不窺戶庭。鄉之人士。至有父子執經於門者。傍縣慕其爲人。聘致爲子弟師。公亦不辭。然天性嚴重。有挾貴而驕。及習鄙褻事者。公叱之。或不能悛。輒令束書以歸。人曰。先生不已甚乎。公曰。我之道蓋如是也。鄧文肅公嘗受業於學正君。及爲廉訪使者。屢遣使致書起公。公謝不往。公好施與。會銅錢法廢。有人行哭甚哀。公問之。則曰。父喪在淺土。吾銖兩而積。得錢若干。欲藉之以襄事。今不用。奈何。公曰。爾勿憂也。出楮幣八十緡。易之。不問其姓名而去。甲寅歲惡。道殣相望。公歲暮自黃巖還。逢饑者。輒予錢。至家則其囊枵枵空矣。公恬然不以爲意。唯見官政有病於民。每憤形於色。走公府。具白之。雖不見聽。士君子稱焉。生平不嗜榮名。築幽齋於智山。列圖書左右。又甃石爲山。蒔花藝竹。遇嘉賓之至。抵掌劇談。醜酒賦詩。望之者猶世外人。纖毫塵土。蓋不足碗也。作爲文章。珠貫玉聯。有臺閣之風。時遊戲翰墨。筆法穠逸。可玩。兼善畫竹石。韻度清灑。頗近文湖州。此皆公之餘事。至論其學術。則一以考亭朱子爲宗。毫分縷析。洞見其肯綮。著之事爲。不易心於賤貧。不屈節於名勢。綽然能任人師之重。是以登其門者。皆彬彬雅飭。諒而不頗。其兄聖卿。識見夙異。以辭章自豪。雖與公友。恭無間。獨於論

辨稍不相合。必面頸發赤。不明不措。公長身疏鬣。衣冠整嚴。昂然如出林之鶴。見者畏而愛之。因公所自號務光。而稱之爲務光先生云。其所著有言志稿四卷。六藝編六卷。存養錄十二卷。尙友編五卷。世運略八卷。家傳一卷。政事書一卷。皆藏於家。公娶謝氏。後公若干年卒。子男四人。曰公昌。大寧路儒學正。曰公顯。濠州儒學正。博學而能文辭。曰公福。曰公良。女三人。皆適宦族。王良佐。王環。趙永。其壻也。公壽五十有四。至順壬申七月某甲子卒之日也。公卒時。諸孤尙幼。逮至正某甲子十月某甲子。始克奉二柩合窆於臨海磧嶺之原。旣已成禮。公顯乃奉公同門友于君演之狀來乞銘。予聞天台爲靈越奧區。所謂金庭玉室。瑤樓璿臺。咸在焉。故其下多清修隱居之士。若任次龍。庾子翼。是已。尤原莫作。有如公者。其殆任。庾之流亞歟。雖然。彼長往山林。藐人世如秕糠。視公著書立言。以衣被於來世者。又爲何如也。孰得孰失。必有能辨之者。銘曰。

旣有以麗之。曷從而蔽之。旣有以致之。曷從而避之。胡熙辰之遘。而大耋是遺。訃伸雖人顯。晦則時乃浚。洛伊乃達泗沂。乃牖夫民彝。磧嶺崔巍。白石如脂。太史勒辭。尙知爲務光先生之碑。

故黃府君墓碣銘

予從烏傷黃文獻公游。識公從子仲華。甫進承公話言。退與仲華盤桓華川上。溫潤如瓊瑤。使人不忍厭去。公薨。世大變。甲兵滿天地。東西各不相聞。及真人起臨濠。廓清六合。予入侍講禁林。會浙江行中書新貢士至。有黃昶者。來敘世契。問之。實仲華諸孫。復叩仲華何如。則作土中人五年矣。爲太息者久之。昶尋

從予入史局。幾一載。間自撰仲華行狀。涕泣請銘。仲華名標。仲華字也。自幼嶷然有立。出與羣童。放步武有度。不失尺寸。鄉先達。趨之。暨長。撫世酬物。悉中權度。州里譁然稱之。曰能。父兄素懦懦。疆畝爲豪右。兼并。仲華奮厲。致家之肥。悉納金贖還。自是益敦仁厚行。貧而貸泉者。不責其息。稍弗能。庚焚券示之。或有忿鬪者。赴愬於門。仲華聽已。指曰。爾言曲。爾言直。皆心服去。且曰。得黃公片言。賢於縣令長十人。避兵石門山。一婦疲臥荒榛。時游騎已迫。仲華命媵女扶以奔。與諸婦同寢食。寇退。詢其家歸之。然終不識其面。性至孝。親疾進藥劑。無時。夜不遑甘寢。及歿。衣槨棺窆之費。咸出於私。不忍煩諸兄。文獻公剛介。子弟鮮得。懽心。仲華曲盡其承。酣觴笑談。煦煦如陽春。親屬有使酒難近者。且復諫。仲華從容白其利害。卒至改行。仲華行事多類此。他不能悉書。仲華卒於吳元年三月十一日。某月某日。葬於崇德鄉平洋原。先墓之次。壽六十七。世系遷移之詳。文獻公已見諸圖記。曾大父。堯。宋承節郎。元贈嘉議大夫。禮部尙書。上輕車都尉。追封江夏郡侯。妣徐氏。追封江夏郡夫人。大父。鑄。贈中奉大夫。江浙等處行中書省參知政事。輕車都尉。追封江夏郡尉。追封公。妣童氏。追封江夏郡夫人。父。溥。妣喻氏。仲華配室傅氏。生子三。燦。琥。瓚。女一。適劉如珪。孫男四。永。昶。庚。敏。予惟閔閔之家。鮮克由禮。有若仲華。閑雅整飭。抱齊魯諸儒至行。孰謂非賢邪。予故特銘之。以爲聳善之助。使人人取則。仲華其不爲三代之民矣乎。銘曰。

中恬而熙。外廉而隅。惟義之是隨。大振厥家。尙質去華。肫肫乎無涯。有歸者山。有列斯泉。靈氣之鬱。辛體魄斯安。繼以永年。

故巾山處士林君墓碣銘

予來南京。索文者接踵而至。多以衰毫力辭。一日。有持隴上白雲稟相示者。勉強一視之。彬彬乎卿雲也。英英乎嚴花靚妍也。泠泠乎若幽人狷士。飲冰而嚼雪也。予亟問之。斯何人之詩也。持者踴而答之。宗之先子所賦也。先子諱茂濬。字顯之。姓林氏。世爲天台望族。生平酷嗜吟。上自漢魏。下逮唐宋諸家。無不漱其芳腴。挹其真醇。積而後發。發必竭盡其興趣。雖雕胃琢腎。弗顧也。嘗構一室。深廣尋丈。內外以聖塗之。白色晃眩。若積雪初霽。月光穿漏。雖赤日如火。涼氣亦備。翛然生。先子澄坐其中。而吟事益暢。遇嘉朋至。焚香啜茗。談古今事。上下三千年。玉貫珠聯。言纒纒可聽。或取雅琴。一再行。起步白雲縹緲間。遠近望之。以爲神仙中人。晚年頗嗜金丹之學。取周易參同契與二三友講之。嘆曰。一氣孔神。無爲之根。水火交遊。載其營魂。浮游規中。存之又存。粗穢旣澄。游神九門。奈之何捐棄之邪。乃調息致修。取心一物。一道一之說。自呼爲三一子。通元之士多奇之。集賢院聞其操行清絕。不樂仕進。因其所居巾山。以巾山處士號之。先子弗欲也。吳元年丁未九月二十八日夜。漏下三刻。大兵下台城。先子亟出。沒於河。年六十又三。洪武八年乙卯某月日。葬於臨海縣興國鄉慶善里龜溪之原。惟先子素行敦飭。親仁善鄰。具有恩意。而所謂白雲稟者。尤爲時所傳誦。墓門有石。不肖願圖文鐫之。顯微闡幽。在先生一揮翰間耳。敢再拜以請。嗚呼。予爲文所累。幾欲燔毀筆硯。若而翁者。其事有可書如此。又安能靳一辭耶。遂序其事而繫之以銘。處士曾祖某。祖某。父某。母某氏。先配杜氏。生瑜。繼室章氏。生宗。卽來速銘者。以學行舉於朝。授南陽府同知。



鄧州事遷太原府通判女二杜元昭金仲德其壻云銘曰  
不豔於榮不徇於聲一以詩名弭其人龔發其天倪龍虎功齊寄情五絃羽衣臨隨望之若仙尸解於河  
其幻則那壽何少多邈哉紫虛有鶴來歸千載之思

故姜府君墓碣銘

君諱澤字潤甫姓姜氏其先居蘭溪之髦賢祖某父思齊以貨雄於鄉環其居五里所凡山若田皆克有  
之及君之生其父已五十餘越三年父卒又三年母時氏亦卒貧夫欺君之孤弱挾黠隸爲姦利內蠱而  
外蝕之并吞幾盡君之女兒道真時歸金華楊某矣聞一歸視君撫君頂泣曰姜氏之世不絕者僅有  
此息爾苟或凶豎欲去之以滅口則宗祀必絕爲若敖氏之餒鬼矣夫豈可哉區區貨產有不足計也急  
挾之以歸楊氏鞠育之如己子稍長俾從鄉先生楊夢斗王月溪趙松坡董覺齋游志慮淵冲而識見迥  
拔遂白於縣大夫復其先塋若干所田若干畝雖僅存十一於千百鄉之人士無不謂君爲能者已而女  
兄命贅於同里之王氏君不忍釋之而去遂舍於女兒西偏挾王同居事之如母與姑每得嘉味必先進  
不進不敢先食及生子若孫歲時相率坐女兒中堂羅拜於庭不知者以爲眞其母姑也君旣受女兒卵  
翼之恩所以思報之者備悉志慮及女兒喪夫而無子爲立從子恢道爲後而躬扶持之其門賴以不墜  
雖楊氏之嫺黨無不以孝弟忠信淑導之有悖戾者懼之以法令亦翕然聽從君再從姪弘道被造僞鈔  
者所誣弘道初不識其人千夫長帥州官逮繫之從者百餘人君聞之大恐走州中懇其故官眞弘道稠

人中命造鈔者執之。乃妄曳他男子以前。事遂釋。丁未歲。人相食。君往糴七閩。時流民所在成羣。動以數百計。乘間鈔道。莫敢何問。君獨以計脫。卒致白粲來歸。六親賴之以濟。君頗通刑名家書。於新令尤所練習。或有致訟者。質之。爲言其利害。訟爲衰止。君晚命仲子遷婺城中。往來嬉遊。以書史自娛。因以盤隱自號。一旦有疾。度不能以生。因泣謂二子曰。吾非女兄。不克至於此。誓將奉窆窆之事。庶幾少盡心焉。奈何。今且先之。爾等他日。當有以懽吾志。遂瞑。時至正壬午十月三日也。壽六十又一。是年十一月十二日。葬於西山先塋之側。配王氏。後二十三年卒。遂合葬焉。二子曰明道。曰懋。某孫五人。曰焞。曰蔭。曰溥。曰繼。曰善。焞能積學爲名儒。以薦者爲婺州路儒學錄。尋舉進士。擢永平延安丞。孫女二人。長適默成先生。七世孫潘思明。次適陳仁。曾孫三人。曰麟。曰堪。曰增。嗚呼。金華爲文獻之邦。氣習之所移。風聲之所被。往往人多士君子之行。有如君者。不幸遭門衰祚薄之餘。乃能聳然自異。不踣其家。復樂導人以爲善。而據急報恩之志。尤寤寐不忘。夫豈無其故哉。傳曰。大河東流。九里餘潤。此蓋從古而然也。濂不敏。幸與焞同出於聞人先生之門。墓文之屬。有不得辭其責。第深愧者。文彩衰弱。不足以昭幽廓潛。然亦自謂據事直言而無所憾也。銘曰。

孰畀之隆。而闕於逢。其非天耶。一髮之存。卒續厥門。其非天耶。無德弗酬。德與善爲逖。其非天耶。發迹詩書。有孫爲儒。其非天耶。生遂死安。松阡鬱蟠。其非天耶。卓哉善人。延裕於後昆。其非天耶。

故葉夫人墓碣銘

山西提刑按察司僉事張孟兼請余銘其大母葉氏之墓。凡三年矣。予時供奉詞林。日以文墨事上。竟弗暇爲。今蒙恩休致家居。而孟兼亦予告省親。道過予門。又復以前事爲屬。其言極慘戚。予何忍不爲孟兼一銘之乎。孟兼之言曰。大父年踰六表。而未有孫。及生孟兼。具牢醴饗賢士大夫。且曰。吾衰矣。不意垂殁之年。獲抱孫焉。於是賢士大夫咸起舉觴爲壽。未幾。大父亡。大母見孟兼輒泣。尤愛憐之。孟兼病創瘍。浸淫被體。晝夜啼不休。大母與乳母范。鞠諸房中。親爲傅藥。節宣其食與衣。見其學步。學言。每爲喜動顏色。已而嘆曰。恨不令汝大父見之。年十九。禮宜授室。始離大母左右。遊學城南。師事聞人先生。辯析六藝。采刺爲篇章。久之乃歸。大母喜倍於前。已而復嘆曰。恨不令汝大父見之。歲乙巳。朝廷下詔求賢。以圖治安。州縣不以孟兼爲不敏。交章薦之。孟兼將赴京。大母執孟兼手泣而言曰。汝大父念汝甚。唯寐忘之。不幸不見汝之成立。汝今欲入官。當夙夜盡心以奉公上。庶幾不辱於前人。老身雖卽瞑目無憾已。孟兼謹佩服之。弗敢違。既至。蒙恩擢國子錄。轉主事。儀曹。遷丞。奉常。凡歷八春秋。屢思謁告。覲省。動有物尼之。洪武五年十一月二十日。嚴君以書來曰。汝大母以今日終。臨終無他言。唯曰。吾年七十。又四分當死。百無所歎於中。獨惜不與吾孫一相見耳。孟兼讀已。五內分裂。恨不卽死。相從於地下。禮部尙書陶公白於丞相。府。遂以上聞。獲還。哭於墓次。時大母祔墓。大父徐山兆域。距卒時已三十四日矣。自時厥後。孟兼出爲今官。尋陞山內提刑按察副使。痛念祿足以充養。而大母遽捐館舍。盡然傷心。然非辭章。無以白大母之行。而洩孟兼無窮之悲焉。所以不避譴呵。而頻瀆於執事者。職是故也。予聞之。亦爲之愴然。嗚呼。余何忍不

爲孟兼一銘之乎。葉氏諱某，杭之仁和人。父信，母某氏。世以種善聞。年三十，歸浦陽張府君鎮初。府君妻同縣陳氏，無子。葉氏來爲之側室，性慈惠柔順，事陳氏如事姑，復好施與，逢單窶無倚者，捐所有物資之，弗靳。三族翕然稱其賢。生子子壘，二孫長卽孟兼，次善，一孫女適某。四曾孫鈞、朝、幹、全。子自少齡恆得驚風疾，數涉阽危，賴祖妣金淑人保抱攜持，以全性命。竊祿熙朝，位躋法從，常思有以發揚潛德，而一時故老號能稱文辭者，先後漸盡，竟無從求之。方戰惕不自寧，而孟兼乃惓惓徵銘，弗懈，亦可謂知其所重，而竭報本之誠者。予頗愧焉，嗚呼！余何忍不爲孟兼一銘之乎？雖然，孟兼以文章政事著聞當世，繡衣直指，威讐暴彊，其大父母雖不獲見，亦足以慰九泉之望。銘與不銘，未足深議也。銘曰：

君子抱孫，以繼其宗也。斯勤斯恩，奚暇計其瘵恫也。珠之藏橐，玉之蘊璞，寶之俾有終也。爲盤爲敦，光燭於外，大顯厥庸也。樂石勒銘，樹之林塋，馬鬣其封也。

故鄭夫人夏氏新阡墓碣銘

至正三年夏五月，予來讀書浦陽東明山，緜閱之倦，因默坐木榻上，忽鄭君濤喪冠經帶，揖予而言曰：濤妻夏邕，字伯熙，生十九年，卽與濤爲配。又七年，不幸以疾終，所遺一小兒曰枋，始三歲，未能勝薦奠，保母掖至柩前，教之俛伏，枋雖未解事，念母不見，亦仰首作嗚嗚聲，濤見之，雖欲以禮制哀，不自知涕之從出也。言訖，泣下數行，良久又曰：夏氏家本虎林，世有顯人，邕之曾大父天瑞，正議大夫，泉州路總管。大父若木，奉議大夫，建德路總管。府治中，父應孫，承事郎，兩浙都轉運鹽使司黃岩場監司令。司令君妻永嘉陳

夫人陳生二女。伯卽邕。季曰穆。字叔熙。司令君以泰定末來尉浦江。遂許以邕配濤。以穆配濤之再從弟永。後十年。二女實來濤家。去年十月朔。穆旣先逝。今年五月初二日。邕復以一病不起。胡天之降凶於濤家者。若是忍也。邕屢有娠不乳。及得枋。酷愛之。至數易乳。猶未慊其意。聞兒啼聲。中心怛怛然。自是遂得驚疾。疾旣劇。會司令君卒黃巖。邕復哭之哀。迨穆之喪。但能悲惋。已無力出聲。猶日使人視枋。惟謹。考其行事。固無有大異人者。然其小心畏慎。未嘗一日少懈。濤家義聚九世。族屬之衆。幾二千指。邕壹以禮遇之。族屬之人。咸以端莊靜懿稱其賢。邕今已矣。將以十二月初三日。窆於穆之墓北車門塢。濤獨憫其以念子之故而致疾。幸先生賜之銘。使枋粗有知。或謁墓下而讀焉。則念母之心。將油然而生。是先生教枋以孝也。言訖。復泣下。嗚呼。邕之事。誠有過矣。世之人。誠以父母愛子之心。愛其親。庸不爲之孝乎。是宜銘之以厲吾徒。且以警枋也。銘曰。

母愛之。由天衷。子報之。胡不同。倘有人心。當省厥躬。過是墓者。寧不爲之改容。

節婦朱夫人墓碣

節婦朱夫人諱則中。鄱陽人。年十五。歸同里句容縣教諭劉斗鳳。生三子。炳煜。燮。一女。旭貞。而劉亡。夫人年三十二。又二十四年。乃終。壽五十六。夫人自劉沒。悉屏脂澤。弗御。益力家政。晨起坐堂上。更列僮媵於堂下。令之曰。爾爲某。汝爲某。晚各會其成。無爽期者。然樂於振急。遇歲儉。及大雨雪。必散粟。雖疏材之細。亦多藝分給之。人有斗升之糴。主廩者。慵於啓鑰。難之。夫人罵曰。爾飽矣。豈知彼懸餓待炊耶。歲壬辰。夫

人家燬於兵。童御散盡。炳提義旅。隨大將軍上饒。變又死於厲。旭貞適浮梁張子明。未幾。煜亦爲仇家所害。夫人間關出萬死。獨抱炳子玉珊往依張。使玉珊衣垢弊服。雜糞兒牧豎中。卒有急。令竄山澤。夫人身先之。每撫其頂泣曰。我一家兵禍極矣。汝父存亡未可知。劉氏一宗若髮懸弗墜者。賴汝在爾。奈何虎豹又窺伺未已耶。鬼神有知。得持汝以見汝父。我含笑入地矣。言訖。衣袂盡溼。後四年。炳從間道回見夫人。相與保持哭泣。絕而復蘇。夫人指玉珊曰。吾所以不死者。有此故爾。炳因迎養新安。復遷浮梁。竟以疾卒。張舍實某年月日也。以某月日。葬縣東發京鄉之史源。銘曰。

史源之山。揚若曳旌。有歸者藏。太史是銘。過者式焉。知爲節婦之塋。

# 宋學士全集卷之二十四

## 墓版文

### 故封承事郎給事中王府君墓版文

惟王氏所出不一。有姬姓者二族。有媯姓子姓者各一族。有虜姓者析四族。餘未暇論述。然姬姓二族。皆出於周。其始於王子晉之子司徒宗恭。其後則太原瑯琊爲尤盛。其始於畢公高之子畢萬。其後則京兆河間爲龍蕃。二者皆以其王族故氏之於王云。太原之族。自秦漢以至於唐。最多顯著。與清河之崔。隴西之李。滎陽之鄭。范陽之盧。天下號爲五姓。載於史牒者。班班可考也。太原之裔。有分居光之固始者。自東晉南渡。來遷泉之晉江溫陵里。圖牒喪。不知其爲幾世。至唐協律郎普。又自晉江遷黃陽之延興里。協律生宋大理評事文郁。大理生校書郎訥。校書生大理評事保隆。評事生莆田縣尉仁暉。縣尉生睿。睿生連。連生顓。顓生鄉貢進士贈奉直大夫國光。進士生給事中晞亮。給事生長溪東尉桂。東尉生贈奉直大夫潤之。奉直生禮部侍郎太冲。禮部生知南海縣事應麟。知縣生元莆田縣典史子春。則府君父也。母任氏。府君諱公毅。字德良。生三年而典史君亡。及稍長。問其母曰。吾父何在。母曰。若父死已久。墓木今將拱矣。府君擗踊號慟。卽製斬衰經帶。追行三年喪。事兄最樂。先生朝。有如其父。絲毫不違其教。今先生時號名儒。以古文著聞。亦盡心於府君。鞠育導迪。無不備至。羣族內外姻皆稱之。府君肄業郡庠。精勤越流。

晝夜將半。隣齋燈火盡滅。府君獨焚膏挾冊。兀坐如枯株。自是能通一經。發爲大義。亦整比可觀。郡博士命題招弟子。羣試於堂。府君特居首列。會歲當大比。同舍生皆踊躍入家狀。期赴鄉闈。府君獨漠然若無聞。或勸之。府君泣曰。予生髮未燥。先公棄捐。一念及茲。肝膽爲之析裂。雖幸母夫人存。鶴髮鬢鬢。而疾疢撓之。恨不化一刻爲一朝。尙忍斯須離膝下乎。杜門不出。日以色養爲事。及夫人卒。塋祭一遵禮度。哀號不暫舍。性好施。家雖單窶。聞人饑凍。輒解衣減食濟之。不然。夜不得甘寢。君子以爲賢。元季政大亂。七閩之豪。挾兵威以擅生殺。割土疆。往往致書交辟之。府君度其無成。皆峻辭已。而亂愈亟。府君挈妻孥避地仙遊山中。曳杖盤桓。而烟霞泉石。日與之相親。及皇朝御歷。六合載清。而府君則頽然老矣。乃謂其長子寅曰。不仕無義。吾非不知也。第迫於親老且病耳。爾當力學。淬行以繼其門。寅遂以尙書中鄉貢第九名。上南宮。未及會試。擢爲給事中。尋兼靖江相府錄事。階承事郎。朝廷推恩。封府君承事郎。給事中。府君之配陳氏。先卒已十年。至是亦贈孺人。寅方攝監察御史。按劾山西。忽官書至驛。言府君已歿。寅匍匐奔還。南京。詣予哭曰。寅罪孽深重。禍延先子。以洪武八年十月三十日長逝。壽僅五十又八。寅將馳歸。擇地縣南香山里白石峯之原。以九年某月日襄茲大事。而起母孺人之骨合葬焉。惟先生職在太史。中朝名公卿之墓。無不藉雄文傳信於世。敢奉楚府仲讀陳子晟狀。再拜以請。維先生界矜之。予聞閩多故族。雖歷年千餘。而其文獻猶有足徵者。府君善承家學。豈不思出就功名之會。獨以親故。不敢頓步捨去。則其敦厲孝行。絕於人遠甚。孝爲百行冠冕。所關彝倫者甚大。此而不銘。烏乎銘。寅能汲汲孜孜。顯露潛德。惟恐



人之不開。府君亦可謂有子矣。府君六子。長卽寅。次曰同。曰驥。曰祥。曰載。曰龍。同、驥、載、龍。天女一。未行。孫一。陵生。銘曰。

人所貴者。身之所本曰親。呼吸相通。實一氣之分。奈何離而去之。南則之越。西則之秦。能敦本而厚倫者。豈不在於斯人。豈不在於斯人。

贈承事郎工部主事劉府君墓版文

濂家食時。嘗如烏傷。其校官劉君浩卿來見。浩卿諱演。美容儀。皙白如冠玉。有鵠峙鸞停之狀。聆其宏議。推闡王霸。欲見之開物成務。建瓴注而健鶻飛也。求所著文閱之。氣充而聲雄。風雨晦冥。雷電恍惚。若鬼神之出入也。濂甚豔其人。數與之游。蓋浩卿受經玉山。鄭錄事明善。錄事精通伊洛之學。望重當世。浩卿獲其傳爲多。濂意浩卿非文墨可羈。必騰迅以升。已而浩卿秩滿去。濂亦潛伏大山深谷。聲迹絕不聞。會元籙告終。皇朝御極。濂應聘而起。累遷入禁林。浩卿之子彬。亦典儀晉王府。既胥會。亟問浩卿安否。則墓木拱矣。濂失聲哭曰。浩卿止於是耶。不覺爲潛然出涕。彬才學日著。轉承事郎。工部主事。改員外郎。間謂濂曰。彬幸藉先子明訓。忝任官使。近得授例。贈先子如彬官。母葉氏亦贈孺人。先子卒時。年五十又四。乃元至正癸巳三月九日。後七年己亥十月二十二日。始薨。麗水縣孝行鄉之桐嶺原。迄今洪武丙辰。越十八載。而懸棺之石無文。非不孝歟。願先生界矜之。言訖泣下。旣而又曰。先子之行多可書。彬不能記其詳。先子事父孝。生能盡養。暨歿。廬墓左者三年。廉訪使者遂以孝廉舉。教諭義烏。移龍泉。興補百廢。孳孳如

嗜欲。陞明善書院山長。以母老辭。先子性謹飭。非大寒不襲重裘。雖暑鑠金。正衣冠而坐。挾冊諷詠終日。與人期在百里外。風雨必赴之。一日行桃山中。見涕淚赴溺者。先子止問之。曰。吾母亡未葬。質先廬得錢二十千。今遺之。欲生奚爲。先子陽謂曰。爾勿憂。誠吾拾之爾。力挽歸家。償錢如其數。其人知非真。拜受感泣而去。先子瀕歿。謂彬曰。金華宋先生最知我。我死當以墓文相累。彬敢銜哀以請。願先生畀矜之。言訖復泣下。瀛曰。瀛實知爾父。爾父有經濟才。志不獲施以卒。耆舊凋落。宜爾不能詳。瀛故掇其槩言之。繫之以銘。劉氏世居括。曾祖某。祖桂。好施與。州里歲儉亦賴之。父德澤。好施如先人。母葉氏。子男子三。長師曾。南康都昌丞。次師夏。卽彬。次師雍。孫男子一。輝。女子四。梁松。朱某。湯謹。其壻也。一未行。銘曰。丹穴之鳳。五色離襪。不高翔於千仞。乃戢翼而委蛇。命也奈何。振古如茲。噫。

故浦江義門第八世鄭府君墓版文

浦江義門。其第八世主家政者曰鄭渭。字伯陽。宋龍游丞德珪之曾孫。東塾處士文嗣之孫。元贈中書禮部郎中鑑之子。年七十二。以洪武十年九月十九日終於家。十一月二十四日。葬於縣東三十里杉柏墓之原。其子樛。樛與其孫焞。勳。合辭請銘於太史氏。瀛乃爲之銘曰。

維伯陽父。自幼穎發。佐諸父齊家。才超然自見也。泉布出納。及米鹽細務。一一鉤校。使無所漏也。更繇之。繁身獨任之。戴星往來。踰三十春秋。不憚煩也。辭意懇款。壹本諸誠。無纖毫人僞也。化行鄉邦。三尺之童。卒皆信服。呼之爲長者也。縣之大夫。踵門問政。告之以利病。民陰受其賜也。方嶽重臣。嘉其篤純。欲辟爲

從事辭不爲也。上繩祖武。下儀孫曾。循蹈規矩。晝夜兢兢自惕也。大田以祭。儼若祖考之臨。勒石示訓。戒勿質鬻之也。合龔十世。中更亂離。左抗右禦。卒使危復安也。羣從同樂。熙熙然如春風和氣襲人。見者革面也。宅心忠厚。不動聲氣。寧人加己。誓不先人也。國初定賦。郡田一斛。驟增其半。白於當路而獨之也。姻家析貲。陳之以乘彝。不以己之親疎爲厚薄。人服其均且平也。宗族有早孤者。收而鞠之。斂其租入。逮長而悉歸之也。有盜持斧斤入林。僮往禦之。反爲盜所毆。僮妻往護之。失足墜塹死。禁僮勿訟。反遣之。櫛櫛也。職此之故。聞其捐館。一郡爲之出涕。貴賤賢愚無間然也。其妻吳裕。字曰靜安。能通詩書。爲一家女師。足以配君子也。嗚呼。世不逮古。夫妻相虐而兄弟爲仇。比比皆然也。有若伯陽父。實中流之砥柱。彝倫賴以扶樹。名教賴以增重。柰何去昭昭而就冥冥也。青山不移。流泉不改。而形容不可復覩。苟可贖之。當人百其身也。嗚呼。勒銘斯阡。言有盡而情無窮。過者讀之。不爲涕泗洑瀾。非仁人也。

鄭彥宏甫墓版文

鄭彥宏甫諱鉅。浦江人也。其家十世聚居。諸父平山府君文泰。才雄志銳。益以義亢其族。特善彥宏。彥宏每侍左右。操其權度。以裁小大之政。府君歿。從兄青憺居士欽。有才如府君。日恢宏之。其宗愈光茂。亦惟彥宏是友。蓋彥宏凝懇而夷冲。其與物交。範防至密。諳練甚精。而於羣從之間。傾誠以相周旋。故得其驩心。其考文轟早世。奉妣黃夫人盡孝。及夫人亡。出寢於外三年。弗近酒肉。哀慟無晝夜。幾傷其生。居亡何。彥宏以次長其家。確守成法。如執玉捧盈。唯恐有媿前人。然所見一定。雖羣言沸騰。終不可搖奪。由是內

外政皆治。會遭兵難。法無少爽。性好施與。天大雪。有童子凍餓道路。彥宏亟溫以酒。且治纊衣之。使養於家。喜注善藥。起人。夜半有告急者。卽應之。亦無留難。一日以事適隣郡。忽有拜馬前者。彥宏曰。吾不汝識。今拜欲何爲。拜者曰。吾家四三人病滯下欲死。賴公藥乃生。食公之德久不報。幸一見。不自知其顛之頓地也。彥宏笑遣之。彥宏壽六十七。以某年月日卒。卒後一月某日。葬於左溪山西源。娶周氏。先十八年卒。生子男三。演淵。洧。演天。淵。洧。皆恂恂善繼。而淵通經藝。以古文辭知名於時。用薦者爲月泉書院山長。女一歸江蓮。孫男四。楷。榿。檀。榿。天女三人。皆在室。彥宏遇人煦煦有恩意。迨沒。人思之弗置。至今有淚落者。昔唐張公藝。李知本。劉君良。皆以孝友聞。史臣稱之。以謂此三人者。孝行推於友睦。而禮遜之風。數世不衰。皆在元魏。齊隋之際。眞所謂豪傑之士。雖無文王。猶興者。今較以彥宏之家。君子咸言過之。而彥宏諸行。又跬步不越於繩窠。非傑然自立者能若是乎。南陔白華。商之季世。僅見之。夫子刪詩。特存其聲。而弗削。況於後世者乎。濂與彥宏游。凡三十年。知之爲至。於是造文表諸墓。以風示人人。庶幾有來取則者。

故章府君嘉版文

章府君姓也。遇孫名也。宗親字也。浦城西邨康州刺史及。自南安來遷也。今居龍泉康州。五世孫都官郎中重。再遷也。又十一世至煥文。三遷縣西之錦川也。煥文生斯立。斯立生格。皆潛耀岩穴。而善利覃於鄉邦。此府君曾祖祖父也。當唐之季。遠祖仔鈞。受唐命。官至檢校太傅。西北面行營招討制置使。勳名著於一時。其妻越國夫人。練氏。懿德陰暢。能全建州一城生聚。生子一十五人。其後多策號。登進士第者幾百。

人若郇國文簡公得象以清忠致位台輔若寶文閣待制衡以文辭卓冠多士若忠恪公誼立朝論事務存大體若莊簡公棗建功涇原而夏童不敢東牧蓋章章者其他位法從典大藩者項背相望此府君世澤也持身凝簡超然百爲之外而毅肅之氣洽於倫類望之如大山中居莫不尊而仰之然耿介無阿私臨事定議則曰某爲回邪某爲審諤凜凜不少貶此府君恆性也凝坐一榻自明至曠未嘗去衣冠發言必思踐未踐則終日若思追追不少寧族嫗比閭三尺童子來見必以禮接弗敢慢且諄諄然戒曰惇爾孝弟引翼爾文學毋隕乃祖乃父聲聞以爲爾家羞人稔其德事不得直亦上謁而求平焉從容諭之輒中其肯綮誓勿頰有司旱暵疫癘泣禱於上下神祇不獲應不止此府君馴行也甲子三百六十有六府君所享年也至正三年五月六日沒之年月日也窆之年月若日則十四年二月十一日也縣之西寧鄉玉峯山之陽葬之地也宋兵部架閣張公宏女府君配也曰珪曰璋曰御史中丞溢子男子也妻縣人士陳師大者子女子也曰存仁曰存質曰某元帥存道曰存誠曰存厚曰存禮孫也件繫羣行而爲之狀者青田劉先生基也譏矣其事而樹文於墓門者盜之同志友宋濂也銘曰

維章受氏出自東海曰齊之姜也奕葉蟬嫣施於北南於燦其光也玉象降徵疊笏成陵爛然有章也府君承之凝簡而昭淵慤以莊也左矩右繩周旋救慎納於危防也不詭而隨不肆而抑不危而涼也含真葆熙脗合至元莫吐耀芒也何以媿之龍劍在橈神珠韞房也苟鬯所施物罔非吉胡斂不張也有子繼志曰隱曰顯各惟其常也棲心奧區三秀孕奇或發休祥也執法中司白簡巖巖凜爲飛霜也玉峯之阡

冲和固結其氣靈長也。太史勒銘鑄諸樂石百世而弗忘也。

故愚庵先生方公墓版文

嗚呼自我齊國文公紹伊洛之正緒。號爲世適。益衍而彰。傳道受業者。幾徧大江之南。而天台爲獨盛。時則有潘子善氏。林叔恭氏。趙幾道氏兄弟。以及杜仲良氏。如此者不能徧舉。皆見而知之。推原體用之學。敷化弘治。而風動於四方。重徽疊照。於斯爲至。流風遺俗。迄今猶有未泯。若我愚庵先生方公。其殆聞而知之者歟。先生諱克勤。字去矜。姓方氏。其裔出睦州元英處士。於宋初十五世祖念四府君某。始遷寧海侯城里。曾大父重桂。鄉貢進士。大父子野。父炯。元鄞縣儒學教諭。母葉氏。宋丞相夢鼎從曾孫女也。先生幼而端凝。五歲知讀書。自辨章句。十歲暗記五經。諸老先生嘖嘖愛賞。目爲神童。年垂弱冠。徧窮濂洛關閩遺書。及尋鄉先達授源委。凡涉性命道德之祕。窮研探索。寢食爲之幾廢。因喟然嘆曰。爲學必合天人而後可。舍是。非學也。至正甲辰。嘗一踐場屋。言國家利害。峭直無所顧忌。有司不敢取。飄然東歸。益閉戶潛心於一卦一爻。必欲驗諸事爲。至於天文地形禮樂刑政及制度名物之屬。亦辨析歸於至當。如指諸掌。會海民爲變。江浙行中書檄吳江同知金剛奴募民爲水兵。先生詣金剛奴謂曰。民計窮而爲盜。未爲盜者亦揆擬欲動。奈何授之以兵。是謂增盜。非禦盜也。金剛奴怒。不答。旣而水兵果於中道殺護吏。逃去從盜。金剛奴踰垣走。折一足。始悔曰。吾不從方先生言。以至於此。未幾。侍御史左答納失里至郡招諭。劉都事基爲之副。先生上書陳勦殄之略。不宜姑息。都事聽其言而不能用。遂致郡縣陷沒。民罹塗炭。先生

發憤入山谷採松柏食之。累日不返。當路延先生入幕府。先生謝曰。我辟穀久矣。弗足與人間事也。吳元年冬。國朝兵取台州。先生欣逢真主之出。乃大有爲之時。疏舉賢才。安人心。黜豪強。除暴斂。明教育。十餘事。將上之。未果。洪武二年。詔立郡縣學。以訓導辟。先生樂於育才。卽起應命。負笈來從者至百餘人。先生據經陳義。曲暢旁通。幾無毫髮遺憾。聞者皆淪肌浹髓。熏爲善良。俄以母夫人春秋高。力辭而歸。諸生追之者踵相接。學舍爲空。四年夏。朝廷聞先生賢。欲致之。部使者袁君宏以書幣來徵。先生以母老。不忍離左右。辟去旁縣。郡承使者風旨。雜逮嫗連督索之。先生上京師。兩詣執政固辭。執政奇先生材。命就銓曹試。考覈入格。名列第二。上特命知濟寧府事。階朝列大夫。錫之冠帶以行。先生至官。爲書一通懸於康衢。諭上愛養元元之意。民有所不平。詣府自言。禁吏胥不得呵問。日引耆耄坐語。訊以得失。郡學官缺。孔子廟堂頽圯。聘前進士爲師。弟子員有未備者。選補之。役浮屠以葺廟堂。廟南鑿爲泮池。榜列兩序。闢射圃於廟北。造弓矢樹正鵠。日一再視學。親爲正句讀。較中否。屬縣之內。社各立學。學凡數百區。學子繫籍者二千人。兵後號爲最盛。始有詔民闢廢田者。閱三載乃稅。吏徵近功。不候期斂之。復以田定起科繇。民益惰。田不增闢。先生與民約。定爲簡書。列爲丁產爲上中下三等。等復析爲三。每有徵發。恆視書爲則。吏不敢並緣爲姦。歲且暮。轉戎衣於燕。時有令役民舟者。有誅別郡以牛車從事。天雨雪。牛僵死於道。破產者十八九。民請以舟就役。僚佐畏令。難之。先生曰。吾知從民便。抵法非所辭也。卽載以舟。具白山東行中書省。省義不問。郡倉絕糧。省檄民七百里轉粟青州。民病不能適。漕運者自淮安輸濟南。道出郡境。先生欲

就輸郡倉而俾濟南致青州告於行省弗聽即以聞戶部戶部奏可行省臣愧之郡城壞故事築以兵指揮使挾貴人勢當五六月聚民萬餘治之民不得田哀號而卽工聲聞數里先生奮曰民病不救惡用二千石爲密聞中書同官疑且得罪不敢署名先生獨署之胡丞相惟庸以聞卽日詔罷先是不雨先生相跳徧禱羣祠涕泣臥祠下誓不雨不還至是詔下民驩呼而散大雨如注是歲五穀俱熟民歌曰孰能我役使君之力孰成我黍使君之雨使君勿去我民父母自是連二歲三禱皆有年五年秋隣郡盡蝗先生省愆變食稽首告天夜聞空中萋萋聲燭之乃飛蝗蔽天而趨郡獨有年民有赴愬者隨事則決大者笞辱小者諭遣之不留案牘尤慎於庶獄月錄日省不使久淹或文有未具時作糜徧食之夏秋之稅每命斛卒持槩高下出其手或至累旬不收民競指倉爲窾先生令民自槩斛卒斂手不敢出氣遇將西成預移文與民期民爭來輸不遺一吏而稅常先登江西浙西二行省運糧百萬濟寧水陸數千里先生視如部民不使有錙銖怨懟舊比每斛益四升以裨蠹耗先生憫其道遠言於朝獨之府召州縣官屬皆役阜隸往往索賂無厭先生下信符置郵無敢不至者信符之籍以印識而中分之吏託月日稽違以媒利先生私藏之緩急有程一自己出復行其法於封內壹以信符召民民得竟并力耕桑楹負來歸者相望於道初赴官時戶僅三萬稅萬餘石三年之後稅以石計者十四萬四千七百戶亦增至六萬有奇二州二十縣家有積粟野無餓孳羊牛鷄犬散被郊坰富庶充實如承平之世至於社稷山川諸祀先生修崇壇壝嚴飭器服或樹名木於周垣之外一如儀制無有所闕水驛在西門內庫陋污溼居者弗寧先生料揀



材木候農之隙。更作於城南。庭堂室房。弘敞逾昔。冬寒河凍。驛舟不行。令舟人伐木爲炭。穿土穴藏冰。因其餘力以成事功。泗水經郡城。南通淮江。北引河濟。地勢高瀉。搆石爲楫。而時畜洩之。魯橋棗林二楫。歷歲久。壞石填河中。舟道難之。役插丁。緮壞石。治灰而甃之。故以葦困痔糧。火屢爲災。教民爲陶瓦。營屋百餘間。申戒火令。編民居爲曹伍。遞相救恤。其患遂止。大將軍魏國徐公達。副將軍曹國李文忠。統士馬十萬之燕。駐郡稍久。要官勢。吏爭索糧芻。相膠葛於前。先生依序酬決。無不如意。一軍稱能。永嘉侯朱公亮。祖將舟師數百艘。北征河水涸。舟膠不可動。脅先生曰。卽趣五千夫浚河。否則以軍法論。日且暮。先生不忍煩民。泣禱於天。夜二鼓。天雨。黎明水起數尺。舟竟去。莫有言者。先生爲政以風化爲急。務以德勝。佐貳始雖倨慢。先生委誠待之。卒自愧服。武夫悍將。不知禮久。亦化戢。在官縱無事。終日冠衣坐堂上。召諸吏。授以書詩法律。或公牘堆几。羣辨方譁。先生片言折之。各心悅而去。性不喜近名。常自誦曰。近名必立威。立威必至害人。吾不忍爲也。府庭之間。不陳杻械。革鞭懸楹間。示不妄罰。省憲考績。爲六府最。八年春。入朝。皇上以爲善治民。錫燕儀曹。使踐其舊職。瀕行。獎諭有加。且曰。政成當顯用卿。秋八月。知曹縣事。程貢嘗以不職被笞。心銜之。上封事言狀。詔御史楊某廉按。楊通程故人。恐程坐誣罪。易民服潛索先生過事。踰兩月無所得。乃捕府中卒吏盡繫之。榜掠無完膚。無一可問者。楊更與其吏謀。誣先生用倉中灰葦。時十月。固未嘗附火。而葦則苦公宇垣。實無私用者。先生不與辯。遂就逮。民號呼填道。隨行百餘里者。將千數。先生次子孝孺。上書政府大臣。願以身爲軍贖父罪。不報。竟謫役江浦。會空印事起。吏又誣及之。孝

孺復草疏將伏闕上訴而先生歿於京師九年冬十月二十四日也壽僅五十又一孝孺與兄孝聞奉柩東歸十年春二月二十四日窆於縣東北深灣章施山之原禮也先生娶林氏諱姬婦道爲一族冠先十五年卒至是合塋生子二人卽孝聞孝孺孝聞年十三居母之喪不食肉至服除人以純孝稱之女一人再娶王氏諱在生女一人未彌月而王卒少房董氏育之董氏生子一人曰孝友二女皆在室未行先生面白如玉鬚眉秀整不妄笑語動容周旋必合禮法兵亂負母逃入深谷兩踵血流遇二弟訓育備至終身未嘗失色與人交率真任質不事表襮不以久近爲冷熱立談之頃洞見肝膈南冠過郡者必以米醪饋之不能步者僦舟車送之萊蕪丞陳川欲迎母爲養厄於無貲出錢五千助之同列以事奪祿買布帛給其用且日延之對食久而弗衰脫逢其飲醉投案大詬而去待之益恭及酒解來謝陽若不知者曰昔之夜吾亦醉矣不識君何謝也生平奉養簡素不服紈綺御一布袍數十載不易日不再肉不治官事輒卻肉不食所守廉甚絲毫不取諸人每行縣以物自隨杯湯不肯受兗州守因童進二木瓜笱童十召州吏還之鄉人有爲饒陽令者以燭雁侑書力卻去乃已初至官時祿米一斛可易金三兩以軍食告乏取十斗爲食餘悉儲於倉或尤其迂不恤也晚年益加畏慎晝所爲之事夜則白於天俯仰皆無愧怍榮辱利害恆視之若一坦然不疑古所謂體道成德之人先生誠庶幾焉其爲文章質而不華平而中理有汗漫集若干卷傳學者云濂私自念齊國文公之薨始一百七十又九年而其學寔微希世取寵者徒剽掠爲談辯誇多鬪靡者務組織爲篇章文公所以扶世教淑人心者率棄爲空言故其臨事之際仰援俯

拾唯恐利不入囊。至有庸夫賤豎之不屑爲者。嗚呼。可嘆也已。有如先生聞風而興。乃能誠求實踐。參前倚衡。儼若上帝鑒臨。涵養既純。發舒自異。仁民善俗之政。至今人人能道之。夫命雖止於斯。而其率性會道。無媿於文公者。尙儼然弗誣也。孝孺久從濂受經。頗知先生行事之詳。於是歷敘其故而繫之以銘。銘曰。

堂堂齊公。命世之雄。伊洛正傳。實爲大宗。入天出人。完傳翼經。有退必疏。無幽不明。疇不鼓篋。千里來過。燦如聚星。惟台獨多。流光所及。寧有翳昏。揭彼日月。輝於天門。逝者云云。滅景銷聲。不有人豪。聞風孰興。猗歎先生。行知尊聞。養氣弗餒。充乾塞坤。實孚名隨。上徹九天。鶴書翩翻。降於邱園。爰自布韋。專城以居。象笏朱衣。於赫其儀。寵恩之加。其廣無垠。曷以報之。誓不顧身。敷宣帝仁。達於齊氓。以煦以嫗。以致其亨。民或勞只。如魴之賴。乃平更繇。俾遂其生。黠胥舞文。其食若狼。乃障乃防。而扼其亢。人相告言。久嬰亂離。父母孔爾。我胡弗歸。十百爲羣。其來如雲。操厥耰鋤。以播以耘。我行其原。萬桑沃然。俯瞰於隰。黍苗芊眠。隣多孽蝗。刺天而飛。避不入境。絕類有知。真儒之效。小試則殷。誰曰漢吏。專美其循。太和薰蒸。郁紛輪困。自此而升。何澤弗臻。大命止斯。傷如之何。視天方高。淚如懸河。我又僎歎。數奇則然。中心無慊。生順死安。善人殄瘁。斯道之衰。顧瞻無依。胡寧不哀。崔崔者岡。渺渺者陂。其中之墳。千載之悲。

故一鄉善士張府君墓版文

浦陽江之上。有大姓曰張府君天錫。字君與。懿然篤厚人也。自成童時。輒知孝敬。日趨大父母。父母側問。

衣煖寒而進退之年既長益推錫類之仁九族有弗振者時卹其匱乏復懼族遠情疎築室南山麓爲序拜旅飲之所長幼之節粲然不紊其於惇愛廣順之道有所賴焉然不自以爲足寒食十月朔汎掃先世諸塋必歷告嗣人曰此爲某府君其名行若何支系若何本末如連珠已而泣曰吾髮種種矣苟不言爾等當不知土中爲何人慎識之勿使牛羊踐履其上平居正襟危坐終日不妄動卽動足跡亦有恆度撫世酬物一以誠有犯之者任其轆轤兩耳如無聞尤不喜以疾言厲色加人人愈愛慕之雖謙腰亦從化俯首趨功驩欣如也及歿不問賢不肖皆歎惋悼惜有至淚下者至今語及府君猶舉手加額稱之曰長者長者云府君之裔初自清河遷已歷十有三世曾大父維大父夢龍湖之儒學正父一寧妣方氏府君生於某年月日歿於某年月日壽若干以某年月日葬於縣西通化鄉施禮山原配室朱氏婦道克修前卒竟合葬焉子三坦泰祐女三石某朱某樓鐵其壻也孫五瑤福驥某某曾孫五某某昔漢之萬石君家以孝謹聞於郡國雖齊魯諸儒質行咸自以爲不及若府君爲人實有石氏之風奈何士習不古文有餘而行不逮尙有愧於齊魯諸儒又何敢望君之藩垣哉是可嘆已坦等遣從孫太常丞丁徵濂勒銘墓門濂聞至正初宗藩賢王有奇府君才者辟爲營田總管府治中府君辭不赴今故不以爲稱而題之曰一鄉善士張府君墓并感其事而銘之銘曰

生之溫守之仁發之淳行之新以飭其身以伉其門以壽其子孫

國朝有天下。患吏之病細民。公卿廷議。以爲吏他郡人。與民情不孚。又多蔽於黠胥宿豪。民受其病。固無怪。莫若立巨室之見信於民者爲長。使主細民土田之稅。而轉輸於官。於是以巨室爲糧長。大者督糧萬石。小者數千石。制定而弊復生。以法繩之。卒莫能禁。是時惟蘇之沈氏以奉法稱。天子親召與語。賜之酒食。時減免其田賦。名聞四方。而上海有夏君者。尤畏謹好禮。緣賦皆先時而集。不煩徵索。愛恤細民。銖兩無所妄取。民咸悅而德之。聯事者皆以爲則。其所爲蓋無愧沈氏。而名未若沈氏之顯者。聞於上。則勢隆而易彰。鬱於下。則雖善而莫著。此余因夏氏之請。而欲揚之者也。君諱宗顯。字叔明。自其曾祖參祖駟。父祥。皆居華亭。君年十五。六喪母。以達禮聞。服終。請於父。出從傅朱學。數年。學有名。遊上海。樂其土俗。遂之長人鄉。置田宅。徙家以居。旣而家日殷富。益敦行義。兄及孀姊老而養。歲時奉粟帛養之。莖其喪而卹其子。撫異母弟有恩。事外舅姑盡子壻禮。聘名士爲師。故人子就學者。飲食之。旦則冠帶坐堂上。子孫盛服入揖。立兩序。俯首聽教命。君各授以事。會食遣去。至夕。取古今事可爲法戒者。辨析講說。勉以爲善。子孫恭謹愿慤。不敢嬉遨。譁縱兇歲。鄉里皆從君乞粟帛藥餌。嫁娶喪災者。取資焉。故巨室之以長厚稱者。必曰夏氏。見君者。慕其善。與君遊者。服其才。聞君卒者。莫不痛惜之也。初。君年未四十。卽穿壙爲塚於舍西北。若干步。及年六十。有六。而卒。遂葬焉。君之卒。以洪武十二年正月二十一日。葬以二月九日。娶王氏。二男。曰應炎。應霖。三女。長適趙志學。次適趙以仁。一在室。孫男三人。翟。彪。麟。女三人。曾孫男一。曰繇。繇。銘。曰。周法旣壞。經界墮。羣氓相啖鼠。與狸。吏庸俗澆逸。不知赤子顛踣。吁可悲。聖神造謨。立治規。俾大育小。勢

相維執隄戾法律攘欺利猶在吻身已離。惟吳夏君懲衆非。畏慎奉上仁以綏。凶歲發廩調困飢。帛寒藥疾棺載尸。居家孝友此其推。子姓愿謹習禮儀。鄉閭愛戴莫敢違。爲富好仁曷能追。天錫爾胤當蕃滋。嗟哉巨室宜相師。欲考令德徵銘詩。

樓母婁氏墓版文

義烏樓璉。詣余禁林。且哭且拜曰。璉也不才。幸獲廁名銓曹。擢主大同宣寧縣簿。歸與母夫人別。夫人慘然若不能勝情。整璉衣出門。涕淚闌干被頰。璉恐重傷夫人之意。忍泣而往之官。僅五月而訃音至矣。蒲伏歸伏草土。今服既闋。吏部用常例別調。行有日。痛念先母遺德未白。舊幸灑掃門庭。執弟子之禮。敢以墓版文爲累。按璉自爲狀。諱慶。字靜嘉。婁氏考某。妣某氏。夫人年二十歸。同里樓君光亨。婦道修飭甚。其姑童氏。御家屬以嚴。織芥有失。輒鬱鬱不樂。冢介間鮮有獲其驩心者。唯夫人能之。處先後唯以柔勝。有恃強壓之者。夫人俛首避去。久之。咸愧赧。夫人亦自如。樓君隱居教授。州里多宗之。每懸燈覽書。直至鷄號。夫人侍左右。不敢先寢。困睫或不可擊。必奮迅自力。習以爲常。嘉朋至。備物以饗。雖截髮弗暇計。其遇族媼。不爲翁翁而趨。不爲淹淹而舍。始終有恆。學者多不及也。一旦病痰厥。喉吻上下隆隆作聲。已而蘇。明日復卒。壽七十八。其時則洪武辛亥九月十七日。又明年癸丑某月日。藏於竹山里先塋之次。子男子四。玗、璉、珍、璉。璉以明經試吏部入官。今爲成都府仁壽縣主簿。階將仕佐郎。子女子三。環、瑜、珥。俞盛、方錫、吳祐。其婿也。孫男三。致中、致和、致剛。孫女四。貞、娟、婉、媛。皆幼。世恆謂陰教不行。天下無良婦。有若婁氏。豈

非婦之良者耶。奈何輕言之。讀予銘者。尙有所厲也。銘曰。  
無非無儀。維婦之常。不有以昭之。孰知其良。余銘婁氏之藏。百世之下。遙有耿光。

瑞安吳門三貞母墓版文

溫之吳荃。不遠千里。踏赤日而衝黃埃。謁予於浦陽江上。旣入。容顏慘沮。弗悅。問其故。輒嗚咽流泣。而後言曰。荃之先世。初家鄱陽。再遷會稽。唐諫議大夫。哇。又自會稽徙溫之瑞安。世有宦蹟。至宋兵部侍郎。沈某州教授。淪。兄弟連擢。某年進士第。聲聞益著。兵部幾世孫。連江主簿。朝宗。無嗣。以兄通判汀州。泰來。仲子諱挺。君爲之後。君元柳州教授。荃之曾大父也。種學織文。名播於邇遐。其配金部郎中張公聲道之孫。諱淑真。柔婉靜專。奉尊章能盡其禮。曾大父方四十一。不幸早世。張夫人少九齡。誓冰雪自潔。卵翼其子。至於有成。壽七十二。以至正元年辛巳八月辛酉卒。五年乙酉二月癸未。葬州之廣化鄉。其子諱欽。荃之大父也。娶胡夫人。諱節。宋瓊州安撫使尙賢之孫。大父學行如其先人。念家世之多艱。奮然欲有爲。寤寐不忘。生一子。諱璟。荃之父也。嗜學如嗜利。罔有怠心。及其冠也。擇松江府判官林公天麟之孫。諱廉爲之室。林夫人瀕行。父以上腴田三千畝畀之。林夫人曰。兒聞女子之行。父母有命戒之言。不聞其他也。敢辭。暨去。動靜具合節文。三族翕然稱其賢。荃父始二十一歲。不幸又以疾不起。時林夫人多二齡。荃在遺腹中。甫九月。荃父臨卒。語林夫人曰。吾家宗祀不絕如縷者。在吾一身。今病革若是。奈之何哉。然吾祖父無涼德。生男或可期。爾能保嬰。惇而養吾二親。吾死爲不死矣。林夫人仰天泣曰。所不如君言者。有如此日。言

終而卒。卒一月而荃生。生一月而大父繼卒。大父年方四十而胡夫人少一齡。二孀母相依爲命。披淚治事。晝夜更抱持荃。嘗指曰。吳氏三世。惟賴此一孫耳。嗚嗚對泣。不能仰視。逮荃六歲。天下釋騷。大俠聚兵。陰竊生殺之權者甚衆。慕吾母豐於財。爭欲聘之。不聽。更以危言震撼。復不聽。因說之曰。當此亂世。有力如虎者。尙朝不謀夕。以孱弱之婦。不翅一輕塵。乃欲保三尺孤耶。知者頗竊笑於後矣。爲汝之計。莫若託身勢家。而心存吳氏。顧不足陰持之耶。林夫人翦髮長號曰。吾聞烈婦不再嫁。此義或乖。禽犢不若也。吾但知不負其夫。遺孤之保與否。則天也。吾言止斯。苟或迫之。有死而已。其說既不行。遂謀勒兵而強委禽焉。林夫人聞之。與姑言曰。事急矣。不可以不去。卽挾荃夜走平陽。冒險阻。履荆棘。茹苦如茹甘。吳故大家。嫌人媵女滿庭。頭指得如意。至是皆散盡。林夫人躬操杵臼以執爨事。食或不充。攻絲枲以貿易之。然猶市書教荃從名人游。脫簪珥以代束脩。且曰。家雖廢。學不可廢也。事姑尤孝謹。姑多疾。畢志竭慮。以事巫醫。忽夢神人謂之曰。無繁飼之卽差。已而果然。人以爲孝感。州大夫朱文憲賢之。欲請於朝。旌表其門閭。林夫人固辭乃止。林夫人居平陽十二春秋。當至正二十二年壬寅十二月己丑。林夫人不幸歿。壽三十九。胡夫人哭之慟曰。上天罰我如是之酷耶。老者存而少者先逝耶。荃時二十三矣。胡夫人由是日夜程督愈勤。唯恐荃之怠也。又七年爲洪武元年戊申。荃始還瑞安故廬。以十二月庚辰。林夫人與吾父同穴。又二年。胡夫人亦卒。實三年庚戌九月辛亥也。壽七十三。塋以五年壬子二月甲申。其穴亦與大父同。所瘞之也。皆謝張夫人云。惟我吳氏寡祐。禍及三世。幾致隕厥宗。其克底於今者。三貞母是賴。前延後引。



靡遺餘力。志節之著。堅如金玉而不變。屹如邱山而不移。稽諸古史傳所載。殆不是過。不肖孤惇然在疚。深懼不能負荷。而先德之卓絕者。又不白於世。一念及茲。涕泗沆瀾而不自知。敢以墓文爲請。惟先生昇於之。言訖。拭涕再拜。濂因譬曉之曰。荃無以憂爲也。一詘一伸。天道之常。荃之家。其困瘁極矣。涵蓄之久。惡知不大發於後耶。栝人有林氏者。當宋之訖。錄家廢於兵。婦姑挾三歲兒奔走戎馬間。幸而得全。二母鞠之成兒。擢高科。而其子孫文墨彬彬。多列廕仕。其事與荃諸母頗類。而酸辛則過之。譬如木焉。收閉華澤於沍寒之日。暢達光榮於和煦之時。理則然也。頗聞荃汲汲好脩。而能古文辭。薦紳先生咸器重之。爵祿之至。孰能禦之哉。荃又有二子。昆昱矣。其胤系之滋。亦將自斯焜煌朗烈。上繼兵部公之步武。似不難致也。荃無以憂爲也。濂故爲白其三母之行。樹石墓門。以志子孫。他時融顯之所自。後之讀者。當以濂爲知微之士云。銘曰。

海東名區。有氏曰吳。世爲簪纓。起家則儒。仁漸義摩。上浹下孚。陰教有翼。大義鑑如。卓哉三母。貞德弗渝。一延於前。備涉艱虞。誓竭肝膽。以樹門閭。二引其後。丁時毒痛。同掘猛兇。以保孤雛。正如鼎足。損一則欹。代有懿哲。庶亡阨危。荼蓼雖操。冰雪自持。中心所涵。其氣吐霓。白石可泐。我忝弗移。黃金可銷。我節肯墮。卒紹三世。免墜一絲。粵稽於天。厥理匪誣。碩果不食。其發必腴。脩榦入雲。濃陰鬱敷。欲構明堂。疇忍舍諸。誰家鬼妻。斬麻爲衰。夫骨未寒。背而他之。君子疾視。何翅蟲蛆。有人心者。請觀銘詩。

表

先大父府君神道表

惟我大父府君卒於重紀至元丁丑十二月己丑後四年當至正辛巳十月壬申墓於金華縣東七十里東烏之山又六年丁亥十一月己未而大母夫人繼卒是年十二月丙申合葬府君之穴又十二年介孫濂始自譏文勒諸墓上不孝之戾其將何逃然自兵興以來潛伏草莽支綴餘息不敢使墜其宗及夫驚悸稍定欲求鴻儒峻生以論譏先德而故老凋落盡矣斯固區區不能自力之過亦遭時孔艱心與事背無以遂其犬馬之私失令弔圖恐終無以示子孫輒忘其固陋而一言之初府君生於宋季宋未亡而官政先亂諸惡少年緝紙爲鎧剪荼爲擾斬牲以祭社神唯務相屠劉匪眦之怨卽蟻附蠱聚求壓其欲而後止府君亦多怨家能以智馭之獨能脫禍及江南入國朝法制未定州縣吏舞文以鹽民府君因毀其家與夫人棲遲小室室中僅容榻案夫人設竈於戶外朝攜釜出炊暮復持入御紡磚直至四鼓目稍瞑卽起敲冰爲盥漱又復從事由是家用頗紓大德丁未歲惡人相食府君出糴於杭亡賴男子結爲隊伍夜半椎人門稱相公殺戮鹵掠呼號相聞里中惴惴不自保時嚴君侍夫人之側夫人與定計以物給羣盜私走告捕賊掾部里兵襲之盡殲其衆府君聞其事自杭馳還見夫人悲喜交集且曰吾意爾母子作魚肉矣尙在耶已而傳酒相慰慶鄉隣咸頓首謝曰微君家吾屬入鬼錄久矣府君性忠信啓口露肝膽不肯作世俗軟媚無實語與人交無二諾友愛尤篤與兄共執里役州家或有科繇至挺身獨任之曰毋以煩諸兄也府君年五十以家傳於諸子晴檐獨坐拄頰看山世間升沈榮辱了若不相關又二十八年

乃終黃文獻公爲表其墓曰吉士云。夫人粹然如玉。而廉隅不可犯。婦道母儀。可爲女中師傅。行事暗合古烈女者。甚衆。齊家壹以禮法。雖細微事。皆遵矩度。入其庭。上下祇肅。無敢大聲疾呼者。歲時出坐堂上。羣子姓捧觴上壽。夫人歷以畏天爲戒。復證以近事。曰某也善。孫子繩繩多。某也不善。人已犁其庭矣。從子有早孤者。宗人利其貲多。欲潛害之。夫人與府君卵翼至成人。爲之納室。而返其貲。半髮不私。夫人端明而有容。其謙損不足之色。津津見眉宇間。卒享耆壽以終。其年視府君又加七焉。濂之生也。與府君同月日。府君特憐愛之。四五歲時。府君坐置膝上。以手循其髮而祝曰。吾祖實寬厚長者。生平好施與。不求人知。吾父孝弟如古人。應物務以柔勝。亦以恤貧之故。致家之索。及吾。唯先訓是式。每衡於心而勿敢忘。承吾之利者。列於前紛紛也。今耄矣。恐且暮死。不能有以詔汝。汝固幼。幸聽吾言。卽聽吾言。期樹善於無窮。言訖。潸然而泣。濂時雖無所識。知頗能記府君之言。嗚呼。府君之爲人。其心厚於仁者乎。濂也不敏。學不加修。不能使府君之名。光輝震耀於來世。兢兢惕惕。若履淵冰。所幸祇翠誨言。立身行己。頗無愧怍於人。庶幾弗悖於府君之教者。唐李翱爲皇祖實錄。有云。先祖有美而不知。不明也。知而不傳。不仁也。府君之美。濂旣知之矣。雖不能工爲文辭。不可緣是以自陷於不仁之域。於是以特牲告於神道。列府君之言。行而附見夫人之事。貽諸孫子。使繼夫爲善之志。歷百世而毋怠云。府君諱守富。字德政。姓宋氏。金華潛溪人。父諱溥德。母周氏。夫人姓金氏。諱妙圓。父諱溥榮。母謝氏。生四男一女十三孫。其世系之詳。已見於翰林學士承旨歐陽公所述。刻諸石矣。不書懼瀆也。前史官介孫濂自製。

石刻載府君世系。今錄於左。其文曰。宋氏世居京兆。唐大理丞憲武德間。遷吳興。憲字秉彝。爲易講師。弟子數千人。生有嚴。有嚴生邠。邠生綬。綬生元熊。元熊生忻。忻生羸。羸生歿。歿生宗捷。宗捷生服。服生僕。僕生循。循生伯旒。伯旒生榮。周廣順中。遷義烏。覆釜山。榮字體仁。通尚書。春秋私諡文通先生。生甫。宋雍熙末。遷根溪之宋村。甫字師杜。生訓。訓生帳。帳生祥。祥以弟海子阜後。阜生侃。從榮至侃。七世皆爲鉅儒。侃生永敷。柏嘉定初。同遷金華潛溪。柏字秉操。以兄永敷子溥德後。溥德子卽府君。諱守富。字德政。履仁蹈義。類古篤行者。妻金妙圓。賢甚。一言一行。可爲女中師法。生文昭。文昭。文馨。文隆。文昭一名朝。字文靈。有隱德。朝廷賜號曰蓉峯處士。生淵。淵。義烏醫學教諭。濂博極羣書。自布衣召入史館。爲編修官。著孝經周禮傳。龍甲子。數十萬言。元至正中。遷浦江孝門橋上。文囿生澄。渭。沁。涓。澤。潤。文馨。生深。汶。瀛。文隆生瀟。淵生瑛。濂生瓊。澄生琦。懋。承。理。沁。生珠。瓊。瑛。生性。怡。瓊。生慎。愷。恂。澄。瑛。瓊。瓊。皆儒。噫。府君誠吉士哉。何其孫子之賢且多也。史官歐陽元述。

先府君蓉峯處士阡表

嗚呼。惟我顯考府君之歿。旣窆白石山阡。與顯妣夫人同穴。於是距顯妣卒且葬時。已二十春秋。顯妣壺儀。幸見諸登述。而顯考之隧。有石無辭。輒泣而書之曰。顯考之生也。宋方內附。官府新建。黠胥騁奸。家道因之陵遲。鹽醴至有所不繼。祖妣夫人與顯考鞠躬盡瘁。誓勿蹶其門。祖妣營度於其內。顯考則隨物順成。應之於外。歲增月衍。頗有成緒。祖考府君崇高節。不肯屈人下。鼠輩或加侵暴。顯考於左右之。使得以

懲其非已而繇役繁興。州司臨門。急於星火。顯考每踞屨而往。雖暴露於外。櫛風沐雨。戒勿使二親知。或憫其勞。顯考曰。在外亦差樂耳。不知勞也。歲丁未。大祲。民散爲盜。夜持刃入人舍。貨錢牛羊。聽其所攘。稍不從。卽見殺。顯考時役官中。用計安盜。私聞於公府。集社兵擒戮之。鄉人德焉。雖在事。爲叢沓中。雅志書。詩。見濂頗知學。驩然曰。予家自文通先生以來。世多巨儒。深懼詩禮之澤或絕。以爲君子羞。心怒焉。弗寧。雖夢寐弗忘之。汝宜從名人游。毋殞厥宗。人恆市腴田構華居。以遺子孫。曾不旋踵。墮廢不存者有之。予不能也。其自號有知者。則令遠附權貴人之門。藉威靈以徼榮寵。雖稍與仕籍。而貧墨弗之戒。至身辱家覆者有之。吾又不能也。予所望汝者。爲孝子。爲悌弟。爲良師儒。雖貧至骨無憾。但得州里之人咸指曰。宋氏有子矣。吾之深願也。大抵門不欲其高。惟其德之崇。有子不欲其侈。惟欲其業之修。汝謹識之。嗚呼。濂也將何修以承明訓邪。顯考明白坦蕩。不設機穽。三尺童子亦待之以誠。有上謁者。整冠巾起揖之。嫺朋過從。不以富貴爲之。墮輕。人與共處。愛戀不忍舍。凡見之行事。每相謂曰。是宋處士邪。斯人無僞言。僞行。當信之弗疑。遠公顯卿。慕其有隱德。或遠致餽牢。或升堂而拜。顯考一以禮接。而以義辭。翰林侍講學士黃公游浦陽之仙華山。約顯考偕行。一見之頃。顧謂濂曰。而翁其有德之人歟。容貌辭氣。何其與流俗相去萬萬也。集賢大學士吳公。尤稱顯考之爲人。嘗贊其像曰。形雖臞臞。心則舒舒。蓋執謙以泛應。而樂靜以自娛。所以小人之千自。不能近君子之譽。東西翁如若人者。豈非孟氏所謂一鄉之善士者與。議者不以其言爲過。嗚呼。濂也將何修而有以紹先德也。顯考分在邱壑。不嗜仕進。至正初。有上其名於朝者。賜

號曰蒼峯。處士顯考曰：是符吾志也。生平無厚嗜，衣取蔽體，食取充口，不見有憂愠之色。晚年尤不嬰世事。盤回夷猶，陶然得世外之適。間取古今事，可喜可愕者閱之，以怡其情。年八十一，耳聰目明，無所苦。一旦得微疾，猶能起坐，食飲如平時。越翼日即亡。臨終一語不亂。遠近聞者，嗟悼不置。省憲二府遣使者致祭七邑，及隣郡之士咸來弔哭，或撰哀輓之詞，動盈卷軸。時陰雨連月，當葬之日，白日杲杲，墓甫畢，雨復如初。衆尤嗟異焉。嗚呼！顯考稟賦粹沖，凡所謀爲，自然中乎繩尺。孜孜以好善爲務，遇有戕賊人者，則爲之蹙額良久。嘆曰：人形而豺虎行，曾不自省邪？故上下咸以爲有鄒魯上賢之至行。人無異詞，如濂不肖，雖戰兢自守，無所愧怍於人。尙恨不足敬承明戒，克紹先猷。年踰五十，猶持無用空文，出應時須，洩涖汨沒，而實德且病矣。每一念之，顏面發赭，不能自已。因撫拾顯考言行，以表諸阡，以志濂之自咎，以告後世子孫，知所取法焉。

滌陽蔡氏道山阡表

祠部主事蔡秉彝詣濂請曰：彝之曾大父諱某，姓蔡氏，初居趙州，因官於滌，遂家焉。娶胡氏，無子，唯一女，懼蔡氏之不血食也，乃命季氏。子冬後，冬負氣自豪，殺人亡命，竟不知所終。遂以女歸來安之許氏。許氏諱清，字士廉，讀書有賢行，平居寡言，以儉德自將。曾大父愛之，曰：是類我也。命以爲子。不聽。久之，乃相從。實彝之大父也。不幸爲高氏子誣搆，以死罪畱園扉者二年，貨產咸廢。而大父無愠容。太父復無子。

父曰。兄若弟。一氣所鍾也。苟戀區區費業。使兄被不義之名。人其謂我何。請避之。仲父爲之泐淵出涕。且曰。吾在子勿憂。於是竟決去。無留意。行至滌。大父見之。嘉其知彝倫之理。與其語。又輕財仗義。有特達丈夫志。亦以女妙靜妻之。封羊豕大饗。媼朋焚香祝天曰。吾再世無嗣。蔡氏之傳將遂微矣。是子其克荷負吾家乎。乃後之。實彝之父也。不數年。盡復大父所喪土田。人有曲行。面直之。鄉黨稱其賢。生四子。長卽彝。次玄童。次壽童。次慶真。及一女。至正甲午三月二十九日。滌陷於兵。先母與女素英抱節赴水死。玄童。慶真。皆不知所往。獨先人與彝間關渡大江而居金陵。先人因憂憤成疾死。時八月十八日也。彝娶王氏。生一子。名繼宗。嘗念三世皆以異姓爲後。雖於先王之禮有所未合。原其情之所至。豈得已哉。彝家素積善。天必福之。異日子孫或衆多。各俾一人承蔡許之祀。而彝復姓孔氏。則於禮爲得矣。然大父之年僅五十七。大母復少四歲而終。父視大母之年又少十歲。母之年則如其父焉。四喪皆於黃道山以昭穆序葬。山在州東北十五里。曾大父兆域之所在也。墓石皆無文。願子爲通書諸碑。以示後人。天地開闢。厥初生民。何嘗知有所謂姓氏。聖人者出。惡其無貴賤親疎少長之別也。於是因生賜姓。胙土命氏。以至於以字以諡以官以邑。而族系漸繁矣。蔡本姬姓。許本姜姓。皆以國氏者也。孔本子姓。以王父字爲氏者也。而三者何可同乎。雖然。凡有姓氏。莫非神明之胄。而出於炎黃之世。所謂二十五宗一十四姓者。尤多流離殊而源則一。逮謂之不同。亦未見其爲可也。然彝之爲孔氏。固爲不刊之論。彼二氏者。豈可忘其所付託。而爲若敖氏之鬼哉。誠令子若孫繼之。一如彝所言。亦出於禮之變耳。嗚呼。氏族之不傳。其淆亂無別亦難明。

矣。使彝不自言。數世之後。惡知有所謂孔氏者哉。昔人有云。人有姓氏。猶衣服之有冠冕。裂冠毀冕。雖有帶裳幅鳥。不足以被飾其身。其任不爲不重矣。其任爲甚重。人反視以爲輕。有如彝者。豈非有識之君子乎。某與彝交既久。若異姓昆弟然。故因其請。爲表著先塋之碑。使後世有考焉。彝字秉彝。爲人慷慨疏通。其從政也。難集之事。談笑而成之。人號爲長才。以鞠同里王時中家。遂壻焉。已而襲其姓。時中既有後。今請於朝。仍氏於蔡云。

故天台朱府君霞塢阡表

孝子之於親。曷嘗有紀極哉。唯恐其嘉謨懿行。不暴白於後世也。件繁羣事。既有狀矣。足以昭於人人。又有无堂之銘。銘比狀著矣。又有阡上之表焉。蓋辭之重複者。事必著。甚哉孝子之心。其有所慎乎。仙居朱府君之卒。多歷年所。其子公立。既請縣大夫前進士魏俊民爲之銘。其二孫木業。猶以爲未足。復來徵予文。表於墓門。揆於古義合矣。予乃按狀而書之曰。府君諱嗣壽。字得仁。姓朱氏。世居台之臨海。宋殿中侍御史希述。其遠祖也。殿中君六世祖友直。仕爲宣撫司某官。始遷仙居之東門。至府君又六世矣。府君之生。岐嶷而深沈。豐厚而敏慧。自爲童子時。風岸孤騫。昂然野鶴之在鷄羣。見者莫不異之。及游鄉校。喟瞻羣經。食芳而漱腴。充然若有所得。且曰。古者爲學。精神心術。一寓之於事。爲或慮其有不正也。必資體驗。擴充之功。所以皓首窮經。不敢輕寘之。若拈華摘豔。鉢心剗腎於辭章間。陋之陋者也。自是撫世酬物。一



遇弟有恩。及其早捐館舍。諸孤貧。喪不得入土。府君泣曰。兄弟同氣也。死而不葬。吾心其安乎。卽命堪輿。家卜地而葬焉。夫妻相敬如賓。自委禽至髮白。無反目之色。教諸子力田孝弟。不許事紛華靡麗。遂名堂曰順德。且賦詩以示意。待族媼廬井。曲盡人情。不以貴富貧賤而爲薄厚疏數。春秋祭其先。儀文並循家禮。升降跪拜。如將見聞其容聲。人取以爲法。治家甚嚴。子孫朝夕冠帶。承候顏色。拱聽訓飭。不命之退。不敢退也。晚年築室東園。藝菊花數十本。當秋高氣清。金錢纍纍然布柔條間。府君熟玩。不忍釋去。或對之酣觴。清詠終日。且謂人曰。菊誠吾良友。吾殆託之以逃名乎。達忠介公兼善。時出鎮於台。聞府君有賢行。將刻薦於朝。府君謝曰。仕將以得祿養親也。親亡以仕。何爲哉。達公亦不敢強。未幾。遭疾。府君度不能起。召子若孫訓之曰。吾晝夜兢兢業業。以克至於今日。非惟仰不愧。俯不怍。抑且可以見祖宗於地下。汝等守爾孝弟。篤爾忠信。蹈爾禮義。厲爾廉恥。庶幾不陷於有過之域。吾雖死。將含笑入地矣。已而遂卒。時至正乙未十月二十一日也。享年六十又九。府君曾祖懋。宋鄉貢進士。祖智。父元豪。補武學生。妣應氏。金氏。府君。金出也。娶同縣呂氏。先十三年卒。子男子二。公立。公成。先四年卒。子女子一。適楊宏祖。孫男六。木。松。棠。棗。楫。木。棠。卽來謁文者。孫女一。歸呂志尹。卒後當某年月日。葬於縣東一里馬鼻山霞塢之原。禮也。嗚呼。士君子之立身也。其功名烜赫於世。則登名於國史。其次焉。則書諸郡志。又其次焉。則藉薦紳之立言者以傳。及其久也。未嘗不與史志相爲頡頏。有若府君之行。斥乎澆漓。葆乎醇熙。一本乎真誠。而弗事乎詭隨。此所謂一鄉之善士。非歟。是宜揭之崇阡。以爲聳善扶世之計。而所愧者。予非其人也。雖然。

予久居禁林。海內名公卿及賢士大夫所銘者多矣。鮮有徵文於十九年之後者。而木與棗有焉。則其久不忘乎親可知矣。予雖欲辭之。而烏乎辭之。若木與棗者。亦可謂之孝孫矣乎。是爲表。

祝母葉氏臨門阡表

姑蔑祝君應昇。謁濂金陵。備列其先母之行。丐濂爲表。揭墓上。嗚呼。濂也。安能表而母乎。夫表者所以焯德著美。爲之庸何傷。而濂以弗能者。非過激也。蓋有所感也。私竊自念。吾先妣之棄諸孤。越十三春秋矣。縣綽雖有其石。而至今無文。方思俯伏薦紳先生之門。以求發其幽輝。而一時故老凋落盡矣。瞻望昊天。盡然傷心。嗚呼。濂也。安能表而母乎。雖然。應昇之請力矣。濂或退而絕之。則應昇將有同濂之感。頗聞之。君子不以病於己者病夫人。於是因應昇之言。而經緯之。應昇之言曰。先母諱了心。姓葉氏。世爲衛人。年二十二。來居先君之少房。其事正室汪夫人。寅畏謹敕。有過無弗及焉。自先君沒。與汪夫人同帷帳者垂三十齡。情意款洽。無乖忤之色。每子婦進飲食。或一味之珍。必叩之曰。汪夫人已食乎。子婦應曰。然。始敢下筯。非惟事長之有禮也。其加厲於應昇者。惟恐弗率於理。時立應昇於前。而語之曰。吾不暇汎引古今。事以詔汝。姑卽汝家言之。汝目擊焉。或耳聞焉。效之宜若易易也。爾祖南劍教授君。與鄉先達徐公友善。徐既卒。二子析田不能平。由爾祖片言而決。各受田萬畝。二子德爾祖之靖其爭也。請以畝二千爲壽。爾祖力卻之。踰年。二子強之益切。乃納其間田五畝。辭多而受少。今人所難。爾當效爾祖之介。當爾祖之歿。爾世父甫三歲。爾父方在。後三月始生。爾祖母江夫人。冰雪自守。寡母孤子。相依爲命。凄然於寒杼。苦

鐘之間。卒能再植厥家。爾當效爾祖母之勤。爾父由儒補郡吏。從衢調婺。台、二州。遷建平縣典史。遇刑獄之有疑者。必傳經典。其無辜坐繫者。必察其狀。理而出之。以故所至人咸稱其賢也。爾當效爾父之仁。爾祖若父。其善行蓋不止是。吾耄矣。不能詳也。以吾之所言。則其所不言者。宜以意逆之也。初。江夫人聘我。以事爾父。我至。則江夫人歿久矣。我不及侍養也。所不深恨者。幸而有爾也。爾當聽吾言。籍而佩之。他日有所成立。使人謂江夫人有孫。是吾志也。嗚呼。應昇何從而能受先母之託乎。先母頗涉獵傳記。每見書紙在地。必掇拾付之水火。雖入糞溷中。亦固取之。人問其故。則曰。倉頡造書時。鬼尙夜哭。可賤而蹂之耶。性尤巧慧。凡紉製縷結之事。極其工緻。諸女多師之。經其指授者。皆合繩尺。然鬢毛種種。未嘗少自暇逸。所御衣衾。或當漱澣。必躬親作之。子婦女隸。求執其勞。弗從也。生於某年月日。卒於某年月日。壽七十二。以某年月日。葬於西安縣靖安鄉大陽門山之原。男一。卽應昇。孫三。曰士成。士同。士寧。先君諱化孫。前若干年卒。其墓旣別有誌。惟先母之墓已久。未有刻文。吾子幸昇之。非惟有以慰幽靈於泉壤。抑將以昭示子孫。使服膺慈訓於無窮也。先是。應昇爲浦江校官。濂獲與之游。嘗爲記其壽護堂者。堂蓋爲母作也。備聞其母賢甚。因爲表其墓曰。詩之有無。非無儀。說者曰。婦人無所專於家事。有非。非婦人也。有善。亦非婦人也。斯言也。豈曰婦人不宜有善哉。以其行不出閨門。謂雖有善。人無從而知之耳。世之婦女。賢者非不卓然明也。頗求其故。皆其子孫有以揚之。故令聞煒煌。不隨時而泯沒也。然則隧石之文。其可不亟圖之乎。嗚呼。應昇能之。而濂有弗能焉。其可忤也已。其重有所感也已。

故孝友祝公榮甫墓表

濂嘗奉詔總修元史。凡天下有關史事者。下郡國長吏。博加采輯。悉上送官。往往吏非知書者。以致龐雜淆亂。不足以取徵。孝友之人。動至數千。皆溢浮辭。而乖實行。濂令史官高啓撰次成編。而親爲筆削之。唯存一百六人。皆灼然可以厲世。惇俗者。而處之祝公榮。亦其一焉。娶與處雖連壤。不知公榮之詳。後七年。公榮之子崑。持所狀羣行。求文表諸墓道。蓋公榮之歿。已十八年矣。狀之稱述。皆傳中所略者。遂次第而序之。公榮諱大昌。公榮字也。居處之麗水官橋里。姓祝氏。祝出軒轅氏之後。至周武王時。封彭祖。遠孫光爲祝侯。子孫爲齊所并。故以祝爲姓。歷代多有顯人。具載家牒。可徵也。五季初。有諱實字茂之者。自信安來。爲處州判官。遂遷焉。壽九十二以歿。葬宜慈杉坑塘之原。實生中奉大夫縝。縝生朝議大夫儒。儒生承議。承議生允懷。允懷生況。況生采。紹聖進士建州司理參軍奕。奕生公冕。公冕生份。份生武學教諭天祐。天祐生潭州司戶參軍詢。詢生之琦。之琦生紹。紹則公榮之父也。公榮孝友出於天性。其在父母側。容色穆穆。以和。父母意有所欲。先候知之。不待出言而事已集。一日不見。心惶惶焉。若亡重寶。得一甘味。雖在百里外。必歸薦之。然後敢食。母病。晝夜鍊藥。奉掉糜以進。衣久不脫。蟻蝨叢生其間。已而疾勢革。走謁於羣神。且泣且禱。語不成聲。見者爲之揮涕。及母歿。擗踊無算。屢至殞絕。其於復襲揆綴斂殯奠祔之禮。悉

順伏母棺而火滅。不意今日於公榮見之。公榮既葬。母朝夕翹首。如有望而弗至。既而曰。是終無以解吾憂也。乃命工搏土肖二親像於堂。朝夕事之。如事生焉。公榮敬兄公亮如其父。家政大小必關白而後行。公亮出仕。公榮不敢中席而坐。恆若公亮之臨乎上。其弟公直亡。公榮奔視。遂頻仆於地。良久乃蘇。抱弟屍而大呼曰。吾弟去吾而何之乎。悲悼過甚。髮爲之早白。撫弟遺孤。逾於己所生。公榮孳孳以同爨爲政。請於公亮。建家範數十則。令子姓分任諸事。視其勤惰而懲勸之。每旦序食堂上。氣象雍肅。若不聞大聲。三世之間。愉愉如也。或者欲問之。說其分財。公榮勃然變色曰。此言何爲。至於我哉。必吾不睦於家。不敦友恭之道。故爾。昔張公藝尙九世義居。況親昆弟乎。苟計利而害義。太處當不食吾餘。因撫膺長慟。言者赧然而退。故處之人士言孝友者。一則曰公榮。二則曰公榮。至今無間言云。公榮風岸偉特。善談史。上下二千年。治忽幾微。如指諸掌。聽者忘倦。尊賢重傅。未嘗有毫毛褻慢意。平心率物。好惡無所偏徇。而尤好施與。故舊貧窶者。周之。死而不能棺者。給之。或丁歲儉。下粟估糶之。青田盜阻行舟。民不能鹽食。公榮出所儲鹽。惠宗族親。媼以及於閭井。人皆德之。當元之季。四方用兵。藩閫大臣多鉤致豪傑。而布衣之士有談笑取將帥者。聞公榮之賢。辟書交至。公榮笑而辭。江浙行中書左丞相方承制行事。署爲處州路儒學教授。亦辭。乃築室南野而隱居焉。不幸以至正二十年庚子正月一日卒。壽五十八。二十一年辛丑某月日。葬於武川飛鳳山下。禮也。公榮凡三娶。先配同縣王氏。次東甌王氏。次閩中陳氏。皆簪纓大族。子男子三人。曰山。曰崑。曰珣。皆好學尙義。崑卽來速銘者。子女子三人。常涓。王達。其婿也。一未行。嗚呼。孝者百

行之根柢。萬事之綱紀也。執一行而百善至。百邪去。唯斯道則然。所以化民成俗者。汲汲焉是務而莫敢忽也。近代之制。文臣自少卿監以上。武臣自正刺史以上。實錄方爲立傳。而能行孝友之政者。雖在章布中。亦必登名。與之齊行。其治化之權衡。於是亦可觀矣。有若公榮之行之美。豈可使其泯泯無傳哉。嗚呼。古之人有云。位登台輔也。爵列公侯也。祿積萬鍾也。馬踰千乘也。歿之日。曾不得與斯人之徒隸齒。此無他。以風教所關爲甚重也。濂雖不敏。其於公榮之事。表而列之。用以爲世道之勸。執曰非宜。銘曰。

孝友之根。實出降衷。金石堪貫。神明可通。古之君子。資之出治。因其秉彝。牖民孔易。雖在布衣。彤筆登名。其意斯何。樹之風聲。閭閻祝君。愛親靡舍。朝斯夕斯。肯離膝下。親旣云亡。塗殯在庭。臨風泣血。哀不自勝。煬入勿戒。火起曲突。有烟勃如。上不見日。伏棺悲號。誓與俱焚。誰謂天高。邈若不聞。若勢方升。熾不可遏。不待反風。虐焰隨滅。家政之修。法古名門。毫髮敢私。惟義之敦。嚴布科條。各授以事。一門雖離。罔有乖戾。辟書交飛。君笑而嘻。我有我政。奚暇外馳。古有篤行。照耀方策。以今較之。孰爲優劣。埃風渺瀰。德化耨鋤。況曰善事。不忘厥初。飛鳳之山。林木葱蒨。勒文墓門。用爲世勸。

故太和蕭府君墓表

大江之西。蕭爲著姓。而居太和之後街者。爲尤盛。唐開元間。有從浙水東來爲縣。遂家焉。譜圖闕逸。不知其名。而相傳且二十九世矣。自時厥後。擢進士第於奉常者。後先相望。宋氏南渡。有爲國子祭酒諱某者。

授宗陽則太和縣校官也。次宗孟。漕貢進士。次則宗元。府君然自祕書而下名皆忘。今以其字書。府君諱夢得。元齋其自號也。生四歲而孤。鞠於母夫人倪氏。年七歲。夫人使之從師。卽知樂學。九歲善屬文。同肄業者皆畏而愛之。已而與翰林待制楊君景行師事。鄉先生達觀楊氏。於是益潛心諸經。而於易學尤精。至元庚寅。詔定江南版籍。適部使者李公行縣。李集多士於庭。試以經義。中者始得預士籍。獨其科繇。府君遂升首選。時倪夫人已老。府君不復有出仕意。科目法行。雖舊日同門之友。多躋膺仕。府君澹然若無營。或問之。則曰。吾母日薄西山。吾尙欲遠游乎。郡二千石及縣大夫數欲剋薦之。皆不聽。尋與漕貢君於縣西二十里創甘竹別業。奉夫人居焉。夫人性好施。遇內外族嫗之急者。必思周之。府君家雖貧。能一如夫人之志。女弟及甥女未有所歸。府君備貲裝配於名族。夫人悅而安之。及夫人病。府君不解衣者數月。死則廬墓左三年。然後返。遠近學者慕府君文行。咸願執經爲弟子。學成而去。若同里楊升雲。若永新吳從彥。若吉水周通。若嘉禾俞鎮。皆爲名進士。其饒饒於北方者尤多。不能悉舉也。府君雖不及仕。其仁民愛物之心。旦旦不忘。縣之賦役無藝。強有力者脫籍。而使寡夫弱子承焉。府君毅然曰。是奚可哉。乃走白上官。稽其物產而甲乙之。編爲義役三年。人以爲允。川梁有敝壞者。勉有力葺治之。鄉隣有訟者。及相關者。是非方糾紛。能以片言決之。不幸以至正甲午八月十一日卒於家。壽七十又七。以乙未十二月某日葬於家東某山之原。娶邱氏。子男一人。飛。女一人。歸廬陵易子韶。孫男三人。曰執。曰安。曰鳳。執。鄉貢進士。今選爲國子錄。孫女一人。同里吳所與其壻也。曾孫男四人。曰珠。曰韶。曰規。曰忠。府君所著書有易學旁

通若干卷。燬於兵。無復存者。府君之葬。周通集羣行爲狀。進士顏成子據之撰銘。納元堂中。禮略備矣。執復來請曰。願有以表諸墓道。嗚呼。爵位可致也。貨泉可有也。聲聞可長也。惟世悼書詩。不可必也。蕭氏自祭。酒士傳經於家。至於府君。尤能繼其志而不墜。其靜也于于。其動也徐徐。不銜露而進趨。每深藏而自腴。殘膏賸馥。霑丐於人者。亦足以獲多士之譽。斯不亦君子之儒也歟。是爲表。

先母夫人陳氏墓表

先母陳夫人諱賢時。金華潛溪人。大父諱艷。惠父諱道閑。母金氏諱信。夫人年二十。來嬪蓉峯處士。處士大雅君子。生平不識僞言僞行。與夫人偕。如鼓琴瑟。生二子淵。濂。一女藝。以至正丙戌正月十七日卒。壽六十有三。其年三月五日。卽窆於白石山。在潛溪西十里。夫人淑茂柔明。及行尤有聞於六親。相處士建。家備極勞勤。晝趨事。夜紉綴諸子衣。大暑夕蚊蚋。擊撲。乃燒燈坐帳中。久之。帳色如潑墨。處士嘗謂夫人曰。吾不解市美田宅。遺兒教之。通一經足矣。夫人深然之。至賣簪珥。使游學遠方。夫人早喪。母事父甚孝。雖在夫家。懸懸慕之如饑。但得食。頗美。亟遣人遺之。不遺。不敢先食。夫人春秋未高。見淵以醫學鳴。用薦者爲義烏教諭。濂亦自布衣召入史館。藝適儒士賈明善。皆有孫矣。居亡何。不幸歿世。濂追痛罔極。魄隕心喪。深懼懿德不顯於後。忍死而書之曰。潛溪有賢母焉。厥質郁如。厥行潔如。厥聲蔚如。白石之山。發徵畜腴。其體魄之所寧歟。是爲表。



故丹谿先生朱公石表辭

丹谿先生既卒。宗屬失其所倚藉。井邑失其所依憑。嗜學之士失其所承事。莫不方皇遙慕。至於灑涕。瀛聞之。中心尤摧咽。不自勝。蓋自加布於首。輒相親於几杖間。訂義質疑。而求古人精神心術之所寓。先生不以濂爲不肖。以忘年交遇之。必極言而無所隱。故知先生之深者。無踰於濂也。方欲聚厥事行爲書。以傳來世。而先生之子玉汝。從子嗣汜。忽踏濂門。以先生從弟無忌所爲狀。請爲表。以勒諸墓上。濂何敢辭。先生諱震亨。字彥修。姓朱氏。其先出於漢槐里令雲之後。居平陵。至晉永興中。臨海太守汎始遷今婺之義烏。子孫蟬聯。多發聞於世。郡志家乘載之爲詳。當宋之季。有東堂府君者。諱良祐。懿然君子人也。蓋以六經爲教。以弘其宗。府君生某。某生迪。功郎桂。迪功生鄉貢進士環。先生之犬父也。父諱元。母某氏。先生受資爽朗。讀書卽了大義。爲聲律之賦。刻燭而成。長老咸器之。已而棄去。尙俠氣。不肯出入下鄉之右族。或陵之。必風怒電激。求直於有司。上下搖手。相戒莫或輕犯。時鄉先生文懿許公。講道東陽八華山中。公上承考亭朱子四傳之學。授受分明。契證真切。擔簦而從之者。亡慮數百人。先生歎曰。丈夫所學。不務開道。而唯狹是尙。不亦惑乎。迺摳衣往事焉。先生之年蓋已三十六矣。公爲開明天命人心之祕。內聖外王之微。先生聞之。自悔昔之沈冥顛隕。汗下如雨。由是日有所悟。心肩融廓。體膚如覺增長。每宵挾冊。坐至四鼓。潛驗默察。必欲見諸實踐。抑其疎豪。歸於粹夷。理欲之關。誠僞之限。嚴辨確守。不以一毫苟且自恕。如是者數年。而其學堅定矣。歲當賓興。先生應書秋闈。幸沾一命。以驗其所施。再往再不利。復歎曰。不仕

固無義。然得失則有命焉。苟推一家之政。以達於鄉黨州閭。寧非仕乎。先是府君置祭田三十餘畝。合爲一區。嗣人遞司稽事。以陳時薦。然有恆祭而無恆所。先生迺適意亭。遺址建祠堂若干楹。以奉先世神主。歲時行事。復考朱子家禮而損益其儀文。少長咸在。執事有恪。深衣大帶。以序就列。宴私浴比。不愆於禮。適意亭者。府君所造。以延徐文清公之地。先生弗忍其廢。改創祠堂之南。俾諸子姓肄習其中。包銀之令。下州縣承之。急如星火。一里之間。不下數十姓。民莫敢與辨。先生所居里。僅上富垠二人。郡守召先生自臨之。曰。此非常法。君不愛頭乎。先生笑曰。守爲官。頭固當惜。民不愛也。此害將毒子孫。必欲多及民。願倍輸吾產當之。守雖怒。竟不能屈。縣有暴丞。好諂瀆鬼神。欲修岱宗祠以徼福。懼先生莫己與。以言嘗之。曰。人之死生。嶽神實司之。欲治其宮。孰敢干令。先生曰。吾受命於天。何庸媚土偶爲生死計耶。且嶽神無知則已。使其有知。當此儉歲。民食糠覈不飽。能振吾民者。然後降之福耳。卒罷其事。賦役無藝。胥史高下其手。以爲民奸。先生集同里之人。謂曰。有田則科徭隨之。君等入胥史餌。而互相顧。非策之上也。宜相率以義。絜其力之。胸臆而敷之。衆翕然從。每官書下。相依如父子。議事必先集。若苛斂之至。先生卽以身前辭氣懇款。上官多聽。爲之損裁。縣大夫勸耕於鄉。將有要於民。先生懼其墮境。邪輻扉屨。往迎於道左。大夫驚曰。先生何事。乃爾邪。先生曰。民有役於官。禮固應爾。大夫曰。勸耕善乎。先生曰。私田不煩官勸。第公田生青芻耳。是時圭田賦重。種戶多逃亡。故先生以此爲風。大夫一笑而去。鄉有蜀墅塘。周圍凡三百六

民食其利。後十年山水暴至。堤又壞。先生命再從子。湊力任其事。以嗣其成。縣令長或問。決獄得失。先生必盡心爲之開導。東陽郭氏父子三人。虐毆小民幾斃。又貫鉞鎗腹。逼使吞之。事移義烏鞠問。當其子父皆死。先生曰。原其故殺之情。亦一人可償爾。二子從父之令。宜從末減。若皆殺之。無乃已重乎。事上從先生議。張甲行小徑中。適李乙荷任器來。幾中甲目。甲怒拳其耳而死。甲乙皆貧人。甲又有九十之親。先生曰。貨甲罪則廢法。徇法。甲必瘞死。親無以養。亦死。乙屍暴於道。孰爲藏之。不若使竟其壅。且慰其親。徐來歸獄。服中刑耳。或曰。甲或逃。奈何。先生曰。若以誠待之。必不爾也。縣如先生言。後會赦。免細民有斬先生丘木者。先生訊之。民弗服。先生聞於縣。將逮之。人交讓。民曰。汝奈何犯仁人邪。民曰。計將安出。人曰。先生長者也。急昇木還之。當爾貸。民從之。先生果寘而不問。先生客吳。妙湛院尼刻木作人形。以爲厭。盡館客陳庚得之。欲發其事。尼懼甚。先生知之。以計給陳出。碎其木刻。陳歸。怒且詈。先生徐曰。君乃士人。獲此弊於吳楚間。甚非君利。儻乏金。吾財可通用。勿憂也。尼後輦金帛爲謝。先生吻而去。方嶽重臣及廉訪使者。聞先生名。無不願見。既見。無不欲交。章薦之。先生皆力辭。唯民瘼吏弊。必再三蹙額告之。不啻親受其病者。覃懷鄭公持節浙東。尤敬先生。以尊客禮禮之。衆或不樂。競短其行於公。公笑曰。朱聘君盛舉諸公之長。而諸公顧反短之。何其量之懸隔邪。皆慙不能退。初。先生壯齡時。以母夫人病脾。頗習醫。後益研礪之。且曰。吾既窮而在下。澤不能至。遠其可遠者。非醫將安務乎。時方盛行陳師文。裴宗元所定大觀二百九十七方。先生獨疑之。曰。用藥如持衡。隨物重輕。而爲前卻。古方新證。安能相值乎。於是尋師而訂其說。

渡濤江走吳。又走宛陵。走建業。皆不能得。復回武林。有以羅司徒知悌爲告者。知悌字子敬。宋寶祐中寺人。精於醫。得金士劉完素之學。而旁參於李杲、張從政二家。然性倨甚。先生謁焉。十往返不能通。先生志益堅。日拱立於其門。大風雨不易。或告羅曰。此朱彥修也。君居江南而失此士人。將議君後矣。羅遽修容見之。一見如故交。爲言學醫之要。必本於素問。難經。而溼熱相火爲病最多。人罕有知其祕者。兼之長沙之書。詳於外感。東垣之書。詳於內傷。必兩盡之。治疾方無所憾。區區陳裴之學。泥之且殺人。先生聞之。夙疑爲之釋然。學成而歸。鄉之諸醫。始皆大驚。中而笑且排。卒乃大服相推尊。願爲弟子。四方以疾迎候者。無虛日。先生無不卽往。雖雨雪載途。亦不爲止。僕夫告痛。先生諭之曰。疾者度刻如歲。而欲自逸耶。竄人求藥。無不與。不求其償。其困阨無告者。不待其招。注藥往起之。雖百里之遠。弗憚也。江浙省臣往討閩寇。深入瘴地。遂以病還錢塘。將北歸。先生脈之曰。二十日死。使道經三衢。時召吾。可使還燕。然亦不能生之也。如期卒於姑蘇驛。權貴人以微疾來召。危坐中庭。列三品儀衛於左右。先生脈已。不言而出。或追問之。先生曰。三月後當爲鬼。猶有驕氣耶。及死。其家神先生之醫。載粟爲壽。先生辭之。一少年病熱。兩額火赤。不能自禁。躁走於庭。將蹈河。先生曰。此陰證也。製附子湯飲之。衆爲之吐。舌飲已。其疾如失。先生治療。其神中若此甚多。門人類證有書。茲不詳載。先生孤高如鶴。挺然不羣。雙目有大小輪。日出明。雖毅然之色。不可凌犯。而清明坦夷。不事表襮。精神充滿。接物和粹。人皆樂親炙之。語言有精魄。金鏘鏗鏗。使人側耳聳聽。有蹶然興起之意。而於天人感應。殃慶類至之說。尤竭力戒厲。反覆不厭。其文其教。其

明強弱皆獲其心。老者則愛慈祥。幼者則樂恭順。莫不皆知忠信之爲美。固未能一變至道。去泰去甚。有足觀者。或有小過。深掩密覆。唯恐先生知之。凡先生杖履所臨。人隨而化。浦陽鄭太和。十世同居。先生爲之喜動顏面。其家所講冠昏喪祭之禮。每咨於先生而後定。蓋先生之學。稽諸載籍。豈以躬行爲本。以一心同天地之大。以耳目爲禮樂之原。積養之久。內外一致。夜寐即平晝之爲。暗室即康衢之見。汲汲孜孜。毫而。每見誇多鬪靡之士。輒語之曰。聖賢一言。終身行之弗盡。奚以多爲。至於拈英摘豔之辭。尤不樂顧。且以吾道孟賊目之。及自爲文。率以理爲宗。非有關於綱常治化。不輕語也。居室垣墉。敦尙儉朴。服御唯大布寬衣。僅取蔽體。藜藿糗飯。安之如八珍。或在豪大姓家。當其肆筵設席。水陸之差。交錯於前。先生正襟默坐。未嘗下箸。其清修苦節。能爲人之所不能爲。而於世上所悅者。澹然無所嗜。惟欲聞人之善。如恐失之。隨聞隨錄。用爲世勸。遇有不順軌則者。必誨其改。事有難處者。又導之以其方。晚年識見尤卓。嘗自括蒼還。道過永康。謂人曰。青田之民。驕悍。值此法弛令乖之時。必依險阻。嘯聚爲亂。已而果然。又嘗告親友曰。吾足跡所及。廣矣。風俗澆漓甚。垂髫之童。亦能操狡謀罔上。天怒已極。必假手殲之。盡力善以。其。乎。時方承平。聞者咸笑先生之迂言。未幾。天下大亂。空村無烟火。動百餘里。先生所著書。有宋論一卷。格致餘論若干卷。局方發揮若干卷。傷寒論辨若干卷。外科精要發揮若干卷。本草愆義補遺若干卷。風水問答若干卷。凡七種。微文奧義。多發前人之所未發。先生嘗曰。義理精微。禮樂制度。吾門師友論著已悉。吾可以無言矣。故其所述。獨志於醫爲多。先生生於至元辛巳十一月二十八日。卒於至正戊戌。

六月二十四日。瀕卒無他言。獨呼嗣記謂曰。醫學亦難矣。汝謹識之。言訖。端坐而逝。享年七十有八。娶戚氏。道一書院山長象祖之女。先三十五年卒。子男二。嗣衍。玉汝。嗣衍亦先三年卒。女四。適傅似翁。蔣長源。呂文忠。張思忠。孫男一文。櫪。女二。一適丁榆。一尙幼。某年十一月日。始葬先生於某山之原。卒後之五月也。先生所居曰丹溪。學者尊之而不敢字。故因其地稱之曰丹溪先生云。夫自學術不明於天下。凡聖賢防範人心。維持世道之書。往往割裂摺拾。組織成章。流爲譁世取寵之具。間有注意遺經。似若可尙。又膠於訓詁之間。異同紛拏。有如聚訟。其視身心。皆藐然若不相關。此其知識。反出於不學庸人之下。於戲。秦漢以來。則或然矣。然而靈豸不鳴。孽狐之妖。弗息。黃鐘不奏。瓦缶之音。日甚。天開文運。濂洛奮興。遠明九聖之緒。流者遏而止之。膠者釋而通之。一期闡廓其昏翳。挽回其精明而後已。至其相傳。唯考亭集厥大成。而考亭之傳。又唯金華之四賢。續其世胤之正。如印印泥。不差毫末。此所以輝連景接。而芳猷允著也。先生少負任俠之氣。不能撓屈。及聞道德性命之說。遽變之而爲剛毅。所以局量弘而任載重。寤寐先哲。唯日不足。民吾同胞之念。須臾莫忘。雖其力或弗支。苟遇惠利少。足以濡物。必委蛇周旋。求盡其心。應接之際。又因人心感發之機。而施仁義之訓。觸類而長。開物成化。所謂風雨霜露。無非君子之教者。要亦不可誣也。致思於醫。亦能搜隱抉祕。倡明南方之絕學。嬰疾之家。倚以爲命。先生一布衣耳。其澤物有如此者。使得其位於朝。以行其道。則夫明效大驗。又將何如哉。嗚呼。先生已矣。其山峙淵澄之色。并潔石貞之操。與其不可傳者。弗能卽矣。徒因其遺行而誦言之。見聞不博。惡能得十一於千百之間哉。雖然。舍是又

無足以求先生者。敢摭狀之槩。敘而爲之銘曰。

濂洛有作。性學復明。考亭承之。集厥大成。化覃荆揚。以及閩粵。時雨方行。區萌畢達。世胤之正。實歸金華。縣延四葉。益燦其葩。辟諸上尊。真彼達路。隨其志分。不爽其度。有美君子。欲振其奇。血氣方剛。疇能侮予。七尺之軀。忍令顛越。壯齡已踰。亟更其轍。更之伊何。我笈有書。負而東遊。以祛所疑。非刻非厲。曷圖曷究。豈止惜陰。夜亦爲晝。昔離其置。今廓其隙。始知人心。與宇宙同。出將用世。時有不利。孚惠家邦。庶亨厥志。勤我祠事。以帥其宗。況有書詩。以陶以礪。以暢其施。期壽夫物。苟躬可捐。我豈追恤。仁義之言。繩繩勿休。昭朗道真。釋除欲仇。上帝有赫。日注吾目。天人之交。間不容粟。聽者聳然。如聞巨鏞。有聲鏗錡。無耳不聽。旁溢於醫。亦紹絕躅。開闢元微。功利尤博。斂其豪英。變爲毅弘。所以百爲。度越於人。咕咕世儒。出入口耳。競藻鬪華。析門殊軌。以經爲戲。此孰甚焉。不有躬行。其失曷鑄。世塗方冥。正資揚燎。夢夢蒼天。使埋其耀。精神上征。定爲長庚。與造化遊。白光焯焯。表德幽墟。遵古之義。僉曰允哉。是祠無媿。

諸賢方孝婦石表辭

嗚呼。是惟孝婦方氏之墓。夫孝未易稱。余獨歸之孝婦而不靳者。將以媿爲人婦之不孝者也。孝婦姓方氏。諱迎。越之暨陽人。生二十七歲。歸同里楊君敬。敬有母何氏。孝婦左右就養。唯恐違其志。何病腑道澀。不能親御。偃溷。孝婦浸之湯盆中。以指探出之。積歲之久。手文皆龜裂。而孝婦未嘗有倦色。昔人有爲親浣廁。論者。史臣尙以爲難。載之於策。考孝婦之事。六人所難者。耶人之所難者。且若是。則孝婦其他之行。

弗問而可知也。嗚呼！是尙不得爲孝婦矣乎？使如此而不得爲孝，則夫勃谿而不恭者，乃足爲孝乎？予自成童時，讀劉向所傳古孝婦事，以爲斯世何爲無此人。心雖未敢必其無，然歷三十餘年，卒不能一逢。嗚呼！余豈意今於暨陽乃見之也。暨陽距余金華僅二百里，余昔嘗兩至其處，而不知有孝婦。至今始得知之。嗚呼！予又意世之如孝婦者，夫豈少哉？特以不遇於君子，故湮滅草萊，而人弗聞之耳。其弗聞者，予固無如之何。其幸而得聞者，可不大書揭之崇阡，以媿人婦之不孝者耶？非惟媿人婦也，抑將媿人子也。孝婦性儉慈，頗知讀書，嘗鬻田教子，父德在，母張，皆宦族。年六十一，生二子，恆慧。其卒以至正二年九月五日，其葬於馬鞍山，以三年十二月二十二日云。

誌凡二章

故成穆貴妃嬪誌

成穆貴妃孫氏諱某，其先世居陳州。父和卿，仕元朝。因家江南毘陵。母晁氏，妃稟性賢淑，聰慧過人。父母既亡，長兄樸治家事，值元末天下大亂，妃年十三，隨次兄範避兵揚州，遇青軍陷城，一時離散，範不知所。在。元帥馬世熊妻遂育妃爲義女。年十八，未聘，上聞其有容德，詔納宮中。及至，言行皆有禮法，如古賢女。嘗請於上，訪求樸，得相見，上卽位，冊爲貴妃，位居衆妃之首。妃益小心恭謹，事上甚至，有儆戒相成之助。佐皇后以理內治，宮壺肅雍，上下咸無怨者。侍上十有五年，生四女，其第二女早卒。洪武七年秋九月癸未，妃得疾，至庚寅薨，年三十有二。上爲之感悼，詔諡成穆，復緣人情定議，命東宮親王持服一期，勅有司。



營葬具甚厚。念其無子，賜田租三百石，令模供歲時祭祀之費。卜日未得吉，停柩宮中者兼旬。至十月己酉，始權厝京城朝陽門外褚岡之原。禮也。塗殯有期，謹奉勅書其卒。葬歲月，納諸塋中，嗚呼哀哉。

故檢校孔君權厝誌

故奉議大夫湖廣等處行中書省檢校官孔公諱瀛字，字世表，宣聖五十三世孫。初家曲阜，四十七世曰傳，始遷衢。故事，孔子之後，得補文學掾。公年二十，有司以名上，署昌國州學正，教授岳州。湖北廉訪使者辟爲書吏，除江浙等處儒學副提舉。階將仕郎，間乘馬出道，逢宣政使，騶從甚都，公直前不避，使人讓之。公曰：我真聖人之裔，官乃僞浮屠，豈應相避耶？政成，以入廣例陞尹海陽。政浹江二邑，民安之。湖南亂，公供僦軍中，朝廷錄其勞，授以今官。尋以使事入蜀，議連兵殄寇，至蜀，蜀亂，公問關巴峽，聞久之，復經雲夢，汎洞庭，回鄂。鄂又亂，妻張子思樵溺死，僂膝散盡，唯繼室高昌氏及爨下兩丁孀存。公度鄂不可居，航彭蠡，直趨豫章，尋自豫章下九江。九江又亂，百具咸沒，公被垢衣，偃偃走，持孔氏南北譜，惟恐失之。見者或曰：迂人哉。或曰：此知本者也。公一弗顧，轉徙來金陵，依富川族孫克仁居。會高昌氏生子，頗自慰，曰：得是亦足矣。越三月，子死，竈嫗亦亡。公旦暮淚不收，衢抵金陵路餘一千耳。思還衢未行，適衢人至，言其家廟蕪不治，田若廬，爲戍兵所據，益鬱鬱弗能解，血出陰中，藥之劇，或具牲幣請禱鍾山神，公罵曰：死生命爾，神安能制哉。急去，毋污我。迨疾革，召克仁，謂曰：克仁，克仁，吾出千萬死至此，意能歸正丘首，豈知死於道路，以鬼事累汝。語已，目視霄漢者久之。克仁亦淒然不能對，夜漏下二十刻卒。時壬寅五月二十有一

日壽六十三。公生執綺家。遇風日佳時。必張樂設燕爲樂。趙歌燕舞。交錯乎後先。公頽然自放其中。適甚。末路顛連。子子作寒窶士。然生平俠氣。時時見眉宇間。識者憐之。性頗嚴介。子姓侍側。終日不交一語。多憚不敢近。及是旅死。無爲主後者。唯高昌氏擁鼻號。聲不忍聞。克仁雖貧。力爲具棺斂。擇不食之地於石子岡。距金陵城南三百步。卒以後三日。昇公柩權厝焉。濂與公皆浙水東人。故數遺公。公喜執濂臂曰。吾見子殆欲忘食也。未卒十五日。與會稽梁君元亨會。飲克仁家。公居筵端。劇談。至日西下。飲酒雖稍減。精神浮動。猶津津然。不意公之遽亡也。嗚呼。人孰無患難。未有甚如公者。妻子死欲盡。流控困踣。無所不極。似可已矣。若俾令終於鄉。藿骨從先人。復何害。亦竟實魄於此。其甚可哀也。夫公生神明之胃。歷仕四十年。又得中壽以死。死且得禮葬。視血染刀劍。身膏草莽者。又何如。在公可以無憾。雖然。後嗣弗續。古人所深悲。公不幸蹈之。人歟天也。使公有知。目決不瞑於泉下。奈之何不衰乎。濂聞公死。哭之慟。克仁請志其事。因收淚以書其略。若公羣行之詳。則有俟於撰銘文者。

